

東
華
續
錄

臣朱壽朋敬編

臣沈彭年恭校

九月丁未朔果勒敏奏乍浦副都統凡遇緣事離任向由杭州將軍咨會杭州副都統暫行代理一面奏請簡署歷經遵辦在案今調任杭州副都統前任乍浦副都統富爾琿已於八月初五日到任新授乍浦副都統世祿尙無到任日期其乍浦副都統員缺未便虛懸自應援照存案辦理奴才當於八月初六日照案咨會杭州副都統富爾琿暫行代理去後正在繕摺奏請 簡署間詎意該副都統恭報到任之摺暨一切文移稿件均已自用署理副都統字樣奴才察閱之餘不勝詫異伏思設官分職 朝廷定制甚嚴與奪之權操於君上臣下何得專擅乍浦副都統係大員要缺今該副都統富爾琿未奉 諭旨自行署理實屬顯違定制奴才係屬同官會稿辦事不敢扶同徇隱自蹈欺朦之罪謹據實具奏伏乞 睿鑒其乍浦副都統員缺是否即令富爾琿署理抑或如何辦理之處奴才未敢擅擬恭候 命下遵行上諭果勒敏奏調任杭州副都統富爾琿未奉諭旨自行署理乍浦副都統原缺顯違定制並該都統於用印事件並不查照向章鈐用將軍之印各等語著富爾琿明白回奏其乍浦副都統印務俟世祿到浙

後富爾孫再行交卸○諭戶部奏遵議殺虎口監督短徵盈餘銀兩一摺前任殺虎口監督載步於經徵稅銀共短收盈餘銀一萬五千六百四十餘兩之多原有應得降二級調用處分惟據稱實因晉豫等省被災貨物未能銷售以致歸糧虧短與稽徵不力者有間加恩著照部議改爲降四級留任不准抵銷虧短盈餘銀兩著按限全數完繳其所徵盈餘銀兩並節省解費共銀一萬六千九百八十七兩零著交廣儲司該衙門知道○諭金順奏請將已故大員子諱等語前署古城領隊大臣升任哈密辦事大臣保恆於同治三年回匪攻撲古城極力固守積勞身故業經准建專祠賜卹著再加恩予諱以彰忠懇○命潘祖蔭充 實錄館副總裁○諭崇綺現在出差吏部右侍郎著麟書兼署馮譽驥現在出差刑部右侍郎著章華兼署○諭潘祖蔭奏遵查專案工程請派員承修一摺所有 慕陵 隆恩殿及內務府營房圍牆工程著派本年承修另案工程之大臣恩承祁世長敬謹承修餘依議○曾國荃奏山右營寨之弊曾經臣與前工部右侍郎臣閻敬銘奏明重申嚴禁欽奉 諭旨 在案嗣經翰林院編修李用清周歷各屬州縣稽查賑務就便察看營寨詞據該編修緘稱各州縣自奉諭禁之後鄉民頗知悔悟所歷之處種穀粟者較去年約減十之六七乘此大祲糴糴之時勸民改業可期事半功倍倘或失此機會往後滿除更難等語臣查該編修所言甚有見解惟愚民無識非嚴懲重罰不能挽回鋼習查兩江禁止營寨有將地

畝充公章程立法不甚苛擾最爲民間所畏懼臣擬以後督省如有栽種營粟者一經查出卽將該戶所種營粟地畝全數充公作爲各村本甲公業仍責公正耆老社首經營以便地方公用倘各屬州縣稽查不嚴卽將該管地方官分別撤參有能力禁而不擾累閭閻者飭司註冊獎勵一俟奉旨准允臣當會同閩徽銘刊刻簡明告示遍行張貼庶冀盡絕根株他日再遇災荒不至重妨民食得旨著照所議辦理該撫務當嚴飭地方官紳實力奉行毋得虛行故事○甲寅准江蘇吳縣以女江陳氏直隸天津縣節婦石吳氏 恩賜旌表○允文格奏請山東聊城縣命婦楊朱氏於本籍建坊○乙卯景壽等奏查直隸每年應徵租銀二萬七百五十餘兩以爲軍衛辦放官員校尉每月公費飯食並豫備一切要差口分之用截至光緒元年奏銷積欠租銀四十八萬一千八百餘兩本年曾經臣等迭將庫款難支情形屢次飛催直隸總督轉飭藩庫卽將應徵租銀趕緊籌解等因在案迄今日久竟無起解音耗惟查軍衛例放各款自二年三月起停待至今無可補發且恭遇祭祀壇廟典禮一切備差執事官員請輪昇學校尉應給盤費口分並各項辦公之用均係刻不可緩乃因庫款告罄辦理無所措手現在實屬萬分掣肘豈等再四思維惟有仰懇 皇太后 皇上天恩飭下直隸總督嚴催藩司無論何款趕緊設法迅將本年應徵租銀二萬七百五十餘兩務於九月內呈速起解到衛以濟要需勿再延玩至歷年積欠租銀亦應

作速嚴催按年代交以清庫欸而重要需 上諭景壽等奏請飭催直隸迅解租銀一摺直隸應解鑾儀衛租銀積欠甚鉅現在該衙門各差需欸孔亟著李鴻章嚴飭藩司無論何欸即將本年應徵租銀二萬七百五十餘兩於九月內迅速批解以資接濟其歷年積欠租銀並著嚴催各屬按年帶徵陸續報解毋再延欠○楊啟照奏據杭州駐防旗繕補知府富樂寶稟稱咸豐十一年冬滿城失陷自原任杭州將軍瑞昌乍浦副都統傑純以下官兵男女殉難屍骸約計七千餘口當經民人翁瑞龍等挑赴湧金門外表忠觀附近掩埋日久恐致埋沒俾同該民人履勘明確本係豁糧義地分葬兩處共二百三十五堆南係將軍瘞所北為副都統中係同善堂義塚擬築總墩四周築牆勒石建坊繪圖請核辦等情卽經前撫臣楊昌濬批准飭局撥欸委員興辦在案現已工竣計封築墓壘二處總墩十四堆四面圍牆前建照牆一座牌坊二座及墓碑石礎等項共計用錢五千七百餘串委員驗收均係工堅料實並無草率呈由藩司核明詳請具奏列入祀典前來臣查杭滿營官兵眷口人等罹辛酉之難受害慘烈今以遺骸殘骨就地封塋俾忠魂有所式憑允宜垂諸不朽合無仰懇 天恩准予列入浙省祀典春秋官為致祭所需祭品銀兩按照昭忠祠之例每歲在於兵餉截贖項下動支銀八兩飭發杭州理事同知領辦致祭以降報享而垂久遠又奏據省城紳士公呈內稱贈光祿卿原任杭州府東防同知徐樹楠江西奉新縣人

由進士簽發四川卽用知縣歷宰劇邑丁憂起復選授浙江龍游縣調補錢塘縣尋升東防同知加知府銜丁內艱未及回籍派委帶勇巡防杭城猝於咸豐十年二月二十七日嚙逆竄擾城陷陣亡業蒙照例賜卹前經臚舉故員在任政績呈請入祀名宦祠亦經部議准行伏查故員公明廉惠久結人心其在錢塘縣任內日坐堂皇遇有民間控訴立即斷決當時有神明之號去任之日無一積案此爲歷任首縣所難其任東防同知歷遇險工時值軍興帑項不繼故員愛心如焚每以楮貸興辦悉臻穩固丁憂之後積累過重貧不能歸迄今歲月雖徂懷思益切昔既列入崇祠彰聖代名臣之盛茲擬再隆祀典慰士民尸祝之忱擬請於杭州省城爲故員建立專祠一切起造經費由該紳士等自行措辦不動公項用彰忠節等情呈請具奏前來臣查故員徐樹楠官浙多年循聲卓著其死事情形尤爲慘烈該紳等追溯前徽同深感仰情願捐建專祠具徵遺愛在民久而勿替合無仰懇天恩俯准將原任杭州府東防同知徐樹楠在於杭州省城由紳民捐建專祠以慰忠魂而孚輿望得旨如所請行○丁巳以成林兼署吏部左侍郎○李鴻章奏臣前因畿疆亢旱糧缺價昂奏請暫禁順直各屬燒鍋以濟民食並聲明俟秋成豐稔仍准開燒依舊納稅欽奉本年二月二十七日 上諭著嚴飭地方官卽將燒鍋一律禁止俟年穀豐稔再照舊章辦理等因當與府尹臣出示曉諭嚴飭各屬一律禁止在案自六月以後迭霑甘霖田禾

其形暢茂雖秋初陰雨較多間有被水被蝕之處不過十之一二統計收成約有七八分現在新糧上市價值平減且到處有糧乏人承買貧農當災歉之後房屋衣具半已無存專恃家食所餘糶賣得價及時置備竟有穀收傷農之病若池燒酒之禁則銷路可以稍暢市價不致過減亦足以資調劑夫糧缺時禁燒鍋所以救荒裕食糧多時准開燒所以平價利民皆爲因時制宜起見自應遵照年穀豐稔循舊辦理之諭奏請將順原各屬燒鍋商戶領有部照者准其開燒自奉 旨之日起完納部稅仍酌照部議此後但許歇業永遠不准新開以示限制得 旨如所請行○戊午諭前據御史孔憲毅奏參河南賑務辦理不善率由臬司傅壽彤前署藩司任內倚任非人所致當經諭令涂宗瀛確查具奏茲據奏稱查明陝州知州查以贖並無盜賣倉穀入己情事惟性情榮侈公事不免廢弛趙集成在安陽縣知縣任內被控勒索鹽規業經李鴻章等奏結將家丁照例科罪未聞李鶴年有勒令告病之事該員官聲毀譽參半路璜到安陽縣署任時出示禁止饑民求食語雖失當心向無他惟不免玩視賑務各等語河南陝州知州查以贖署安陽縣事洛陽縣知縣路璜均著即行革職安陽縣知縣趙集成著開缺留省察看至查以贖等均非傅壽彤在署藩司任內調辦賑務之員並非倚任非人向無操守不端及代屬員徇縱營求等款惟於路璜辦賑情形未經考察視以飭回署任爲請實屬冒昧傅壽彤著交部議處○諭御史周開銘奏

東南數省被水飭豫籌拯救一摺本年江西福建湖北湖南等省雨水過多被淹地方甚眾江西饒州湖北安陸荊州湖南常德等處被災尤重荒歉已形明歲青黃不接之時甚屬可慮亟宜豫爲籌防思未萌著各該督撫確查所屬州縣被災情形豫籌拯救之策所有疏導水勢安輯流亡籌辦賑濟勸報賑緩各事宜均著悉心體察妥爲辦理以期有備無患另片奏各省哥老會天地會等匪甚多深恐災民被其煽惑請飭查拿等語著各省督撫於被災地方撫恤饑民毋令失所並嚴飭各屬清查保甲密拿會匪用副朝廷除暴安良勤求民瘼至意○涂宗瀛奏原任刑部左侍郎袁保恆籍隸河南陳州府項城縣爲原任漕運總督袁甲三之長子通籍後曾隨其父軍營轉戰江南安徽山東各省所向有功同治二年以詞臣被 命回籍團練地方深資捍禦後總理西征糧臺國庾旬稽厥功尤偉迭荷 聖朝簡擢由翰林洊擢卿貳上年奉 旨督辦河南賑務本年四月歿於差次飾終 恩禮備極優崇生平歷著勳勤固無待於臣之縷述第卽其辦賑一端功德及民實已有令人誦思不輟者伏思豫省去歲奇荒誠爲古今所罕見司庫罄懸如洗該侍郎抵豫屏絕供張服食粗糲與前兼署巡撫河道總督臣李鶴年籌畫欵項盤剔弊端昕夕焦勞不遑寐處凡有可騰挪之法無微不搜凡有可利涉之事無艱弗任臣嘗見其奏牘暨與各省乞貸信函不啻聲淚俱下其惻忱亦可概見維時豫省各屬均放賑粥而流離轉徙者多半就食

於省關各廩男婦日以數十萬計該侍郎創立規制俾得各就棲息所全活不可勝算復以時親歷各廩
廠查察錯處吏胥之罔拊循指示不憚穢惡不避風雨用能嚴絕諸弊實惠均霑而身則積勞況瘁矣以
故一攫時疫遂爾不起當其未病嘗自爲文告以身代民殃卒之日婦孺皆爲流涕臣到豫僅遲四日未
得接晤至今想望風采凡此教施遺愛雖皆得之耳聞無異目覩洵屬盡瘁 王事允宜報鑒特降 臣既
有志表揚復據閩省紳士前湖南巡撫衛榮光等合詞籲請合無仰懇 天恩俯准於河南省城特建專
祠令地方官春秋致祭並將其功績 宣付史館以彰忠藎而順下情之處出自逾格 鴻慈又奏正在
繕摺間復據淮寧縣舉人李樹培劉俊德拔貢生杜耀德等呈稱已故刑部左侍郎袁保恆世撫忠勤功
在桑梓同治年間與其堂兄已故江蘇候補道袁保慶同辦歸陳團練地方深資捍衛袁保慶故後蒙
恩准其附祀陳州府已故漕運總督袁甲三專祠茲已故侍郎袁保恆前勞未泯復因賑務盡瘁匪躬擬
懇一併附祀等情由司詳請具 奏前來 臣覆核無異合無仰懇 天恩俯准將袁保恆一併附祀陳州
府袁甲三專祠之處出自 鴻慈 上諭宗室奏已故部臣請建專祠並將功績宣付史館及請附祀
伊父專祠各摺片已故刑部左侍郎袁保恆於咸豐年間隨同伊父亡故漕運總督袁甲三轉戰江南安
徽山東等省迭著勞勩嗣辦理西征糧餉籌辦餉需不遺餘力上年幫辦河南賑務盡心區畫尤屬有功

桑梓著照所請准其於河南省城建立專祠地方官春秋致祭並准其附祀陳州府袁甲三專祠該故員功績著宣付史館立傳以昭忠誡○己未諭張家口監督善聯奏差滿回京虧短盈餘銀兩請減成賠繳一摺著戶部核議具奏○辛酉諭沈葆楨奏請將已故提督戰功宣付史館並懇入祀昭忠祠一摺已故配名提督前雲南鶴麗鎮總兵宋國承於咸豐同治年間隨同霆軍轉戰江南安徽江西湖北廣東等省所向有功嗣移師剿捻由湖北馳入河南大破任賴各逆洵屬功績卓著著照所請將該提督戰功宣付史館立傳並准入祀四川湖北雲軍昭忠祠以彰勞勩○壬戌丁寶楨奏理番廳民唐兆元剖肝療親請予旌表允之○以軍機處繕修清字檔冊告竣予理藩院員外郎恩紳泰等獎擢有差○甲子諭山西上年被旱極重迭經撥給銀米以資賑濟本年五月間接據山西巡撫奏報得有雨澤稍慰庶懷方冀轉歉爲豐登吾民於衽席乃六月間又遭大旱被災之區仍復不少殘喘餘生何堪重困今冬明春青黃不接之時深恐饑寒交迫無以爲生朝廷時慮焦慮著加恩撥給山東漕米十二萬石以濟賑需卹由山東巡撫督飭糧道提前趕辦務於年內全行起運毋稍稽延其隨漕輕齋等銀一併先行扣留備用至運解甚屬不易並著戶部撥給庫銀二十萬兩備充運費所有應賑災黎著開敬銘曾國荃督率官紳妥爲經理毋任失所用副軫念民生至意○諭 穆宗毅皇帝梓宮 孝哲毅皇后梓宮永遠奉安山陵日期據欽

天監奏謹擇於光緒五年三月二十六日所有應行典禮及一切事宜著各該衙門屆期敬謹預備○鑲
藍旗蒙古副都統內閣學士奕慶卒 賜卹如例○桂清畢道遠奏漕糧之歸海運河運之藉黃流均屬
一時權宜之計年來海運事宜逐加整理矣而河運事宜略於講求恐終至運道湮廢而不可復夫任事
無專員則畛域各分不能統籌全局濟事無專款則臨時補苴惟冀漫邀大幸年淤一年運河竟無河形
雖欲藉黃濟運將何憑而藉之故宜先籌專款也誠於有漕各省分由漕項內酌提經費若干定爲的款
然後擇一人任其事令周歷查勘全河形勢在其胸中先行擇要施工無誤來歲之運再次第請求逐歲
整理不三四年當有成效可觀若此者則似以專任漕督爲最宜何也漕督原有督運北上之責也既以
治河之事專任之復以督運之事全委之凡一來一往經過河道均令逐細閱看有修治不如法者立即
白簡從事地方各官或者知所畏懼於挑浚等工認真舉辦如果一律深通事竣請獎雖然但以現在江
北漕糧而論米不過數萬石船不過四百號如此異常舉動將人人以爲不必則又須江浙兩省各以
十餘石歸河運安省亦照江北例起運米數萬石同江北歸河運大約運河以內有三四十萬漕糧事體
既重大足以振動一切加以三省之力併力經營即臨時須費些亦覺輕而易舉不然但以江北數萬石
之糧數百號之船謂即開通二三千里積久不治之河道其勢萬難其始可以暫行其終究至必不可行

則運河竟廢矣是故欲規復河運非專員督理不可非集有專款俾資緩急不可至於全河詳細情形何者宜先何者宜後宜添設宜修復均在專任之員相繼圖度非可懸揣也等但據年來所聞散據管見相應請 旨飭下部臣詳細核籌迅速定議請 旨遵辦庶於河運事務有裨 上諭桂清等奏修治運河請飭統籌全局併力開通一摺著該部議奏○戊辰以奉天吉林積匪肅清游擊胡嵩志等升敘有差○庚午祭 歷代帝王廟遣慶恩行禮○辛未諭順天府奏辦賑京員積勞病故懇請表揚開單呈覽一摺京師本年春夏之交饑民四集翰林院編修謝維藩中書科中書姚恩衍戶部主事何金章光祿寺署正吳士達兵馬司副指揮程常憲或創捐設局或襄辦賑務均屬樂善好義勇於任事乃因積勞感疫相繼身故殊堪憫惻著各該員原籍督撫將謝維藩等善行事實查明列入志乘以示表揚○癸酉諭閩散銘奏敬舉賢才一摺據稱翰林院編修李用清留心正學取與不苟樸訥耐苦質直端方此次在督辦賑鉅細躬親深明事理洵屬志節堅毅體用兼優道員羅福福前在山西汾州府知府任內廉隅砥礪峻潔精勤力裁陋規屬無積訟其詳察牧令不避嫌怨誠爲廉公有威不同矯激知府黃照臨歷任陝西州縣廉勤明正潔己愛民曉暢事機才具明敏等語當此時艱孔棘自應振拔賢才以資治理該員等經閣散銘保奏後尤當深自刻勵終始不渝庶幾歷練益深用備朝廷任使○甲戌命在西城教子胡同設立粥

廠以贖回族貧民又北城南下窪太清觀地方官紳捐建公善堂煖廠自本年始每年各賞給小米三百石○丙子以蔡國祥爲福建海壇鎮總兵

冬十月丁丑朔時享 太廟遣本格恭代○彭玉麟奏遵 旨查明樊口地方江水入湖之處必應修補老堤建築新閘以衛民田恭奉 上諭前據李瀚章奏湖北武昌等縣刁矜攔河築閘有礙水利等因又奉 上諭前有人奏樊口堤閘關係農田民命請飭復加查勘等因當即改裝易服搭坐民船星夜上駛於八月二十三日行抵武昌黃岡兩縣所屬之樊口雇一小划入樊口三十里餘即築堤毀堤興訟之處該堤雖毀形跡猶存橫寬不過數十丈直寬亦十丈由此再進則名九十里長港屬黃岡縣者六十里屬武昌縣者三十里此港九十里內港汊紛歧旁通各湖如蘆鰲瓜其右有洋湖洋魚湖月山湖涇頭湖鴨兒湖江夏湖酢洲湖等湖共十二湖其左有根洲湖蘆新湖三山湖保安湖等六湖每年江水未漲之時各湖十餘里數里不等若江水盛漲由樊口入港右則薛家溝東港沈家溝等處灌滿各湖左則由楊澤溝會邱溝東溝等處灌滿各湖九十里長港盡頭處曰磨刀磯始入梁子湖湖心有山有市鎮此湖於江水未漲時周圍不過三百餘里而取西南北所通俗稱九十九汊東通武昌黃岡所屬之長港卽樊口港也西通咸寧興國所屬各汊北通江夏所屬各汊南通大冶武昌等縣所屬各汊而總匯出入之路則實

在樊口舍此無路消漏每年江水灌入各湖港汊不分一片汪洋濱湖各田無不變爲澤國周境則七八百里小民流離轉徙慘不忍言此樊口以內之湖河港汊江水浸灌之實在情形也查梁子湖各港汊兩岸皆平曠沃野農民賴以安業濱湖各州縣所屬濱湖之田雖地有寬窄田有肥瘠綜計共可收穀六百餘萬石而此六百餘萬石穀之收成全賴濱湖田地之不被水淹欲求濱湖田地之不被水淹全賴樊口地方之建築閘壩無閘則無堵禦而田淹田淹則弱者轉於溝壑强者流而爲盜賊有關則水有關關而田熟田熟則農得倍收之利 國多維正之供此事利害甚鉅是非甚顯關係甚重然該處居民各執一說不盡以建閘爲然者何也樊口乃魚米之鄉百姓謀生者有二一則有恆業者以耕田爲業一則無恆產者以捕魚爲業耕田者惟恐江水內灌而禾稼被淹捕魚者惟恐江水不內灌而罾網失利利本相反勢不並存加以一築閘壩則商販貨物有盤踞起旱之費此亦稍有不便之處然以人數計之則耕田者十居七八捕魚者不過十之二三以 國課計之收田課則利倍千百收漁稅不過千百之什一至於商販之盤壩更屬害之至輕者況樊口入湖生意大半皆油鹽雜貨分銷於江夏所屬之豹子洲山坡街賀聖橋等處武昌所屬之謝埠金牛鎮大冶興國所屬之保安街長嶺街碧石渡等處皆有陸路可通本不專走水路惟梁子湖心中梁子街一處不通陸路自然有湖內小划可以往來轉運倘因小有損於客商

漁戶而舉數百萬生靈待食之穀年年付諸洪波巨浸之中因小而誤大因少而失多可以不煩言而解矣然而農民恆弱漁戶恆強農民恆愚漁戶恆黠各湖濱業漁之處曰三山湖月山湖橫山湖銅山湖惟三山袁姓月山湖姓爲巨族該漁戶最稱豪強家有舉貢生監恃爲護符占奪大利袁姓楊姓二族所置田地皆在湖外不患水淹每年江水愈大則網魚愈多一築閘壩雖不失業而利則減矣漁戶楊辛葵楊鳴遠卽土棍楊光明等祇圖利己不顧害人勾結大治訟棍袁甲甫卽增生袁兆麟互爲爪牙倡議斂錢包告包准包挖橫堤盜借各人名紛紛上控肆言恐嚇以聳聖聽而所有呈詞實出袁甲甫一手致令被水地方全家困於迫呼餓夫尙在縲紲無怪各鄉農民恨袁甲甫刺骨皆欲食其肉而寢其皮也至胡炳盧汪幅沅向來皆係好事之徒近年自知斂跡不預外事樊口內各屬百姓前因築成橫堤悉得豐收地方安堵去冬挖開橫堤今春江水漸入衆百姓逃生無路急於重築橫堤公請胡炳盧爲首汪幅沅副之胡炳盧頗懼招禍再三不允衆姓泣求救命始允出而興築萬人歡助每日千百小划拆廢屋竹木截廢堤磚石奔赴工次以期不日告成不使江水滿溜以救禾苗此實愚民不諳法律情急勢迫非眞玩官藐法也當聞派水陸隊伍將往彈壓之時內有不識輕重之人譁稱堤不成不能活命堤成而毀仍不能活命不如一闕而散稍舒憤氣胡炳盧涕泣勸阻而耆老解事者亦悉戒其子弟不准妄爲自取滅族故

官兵一到卽時散去否則禍變不堪設想矣以上各節皆玉麟草筴短衣親身查訪耳聞目覩異口同聲不敢妄參臆說輕聽訛言再四思維悉心酌度欲全樊口內各屬湖濱生命不能不修補老堤建築閘壩所謂老堤者濱江黃柏山起至樊口四十里而有大堤足捍大江前面之水堤身漸已坍塌而堤脚尙屬堅結急宜趕緊修補並須於黃柏山以上添修里許方爲有濟以該山上面尙有塌口可以入水也樊口以內則宜修一石閘其橫直尺寸之寬廣可以度地布置惟必宜建石閘斷不可築土堤土堤呆板而易於衝決石閘活動而便於啟閉如今年水勢未非常有但值春豆播種之時偶有潏漲則江水與湖水消長隨時可以斟酌宜洩實爲兩全無弊之策議者或謂樊口內自古並無橫堤何以從前並無歉收之患不知山谷且有變遷何論江湖潮汐所激朝暮迭更情形迥異咸豐初年從戎江上目覩江形遷徙淺深通塞不知凡幾未便泥昔日之成規誤目前之要務似須因時制事因地制宜方稱妥適梁子湖一帶現近冬令水勢依然浩瀚居民多未歸業被水災區錢糧必須核實蠲免哀鴻滿地觸目興嘆既有可救之策不敢不爲民請命上達 宸聰至建築石壩後並應設立埠頭搬運貨物均由民間自行經理官則嚴立規條重懲需索此則地方官稍能盡心民事卽可令行禁止決無流弊惟湖北有湖通江之口尙多而情形與此不同好事者不得援此爲例 上諭前據御史李廷鑑奏湖北樊口堤閘關係農田民命委

員勘報不實請飭覆查當派彭玉麟等前往確查茲據彭玉麟奏樊口堤閘於濱湖農田民命所關甚重必須將濱江黃柏山起至樊口四十里之大堤趕緊修補再於黃柏山以上添修里許樊口以內宜修一石閘其樞直實廣可以庇地布置並應設立埠頭搬運貨物均由民間自行經理官則嚴立條規重懲需索等語該處堤閘既據該侍郎查明有裨國課民生而於漁戶商販尙無大害自應權衡輕重酌度興修卽照所請由李瀚章等督飭屬員趕緊辦理毋任該地方官拘泥成規稍形鬆懈此次所築堤閘實因地勢變遷必須興辦既可於民田有益而江流宣洩亦無妨礙他處情形不同不得援以爲例訟棍袁甲甫卽增生袁兆麟楊光明著該督撫嚴拿務獲從重懲辦其修堤建閘及被水災區應如何減免錢糧之處並著查明具奏另片奏此案獲咎各員可否開復等語已革監利縣知縣劉煦慶著送部引見廩生郭瑞麟訓導胡書田武舉皮周福生員劉玉田著該督撫隨時察看如果安分再行奏請開復○予鄂省剿匪出力人員副將周有全等升敘有差○山東登州鎮總兵陳澤輔緣事解任○戊寅以吳奇勳爲山東登州鎮總兵○裕祿奏據委管蕪湖關稅務署徵收池太廣道覺羅成孚詳稱蕪湖關稅戶工兼收每年例定戶關正額銀十五萬六千九百一十九兩七分五釐盈餘銀七萬三千兩工關正額銀七萬一百四十六兩一錢五分五釐盈餘銀四萬七千兩共應徵戶工正額盈餘銀三十四萬七千六十五兩二錢三分

內正額銀兩例分兩季解部盈餘一項則係年滿解歷經照辦在案蕪湖關自光緒三年六月初一日起至十一月底止首二兩季徵收戶稅銀二萬九千六百六十三兩七錢九分工稅銀四千四百九十五兩六錢八分前經詳奉奏報並將分別解撥緣由聲明在案溯自三年十二月起至四年五月底止三四兩季又徵收戶稅銀三萬五百九十三兩六錢七分工稅銀三萬二百四十九兩二錢三分綜計自光緒三年六月初一日起至四年五月底止一年期滿共收戶稅銀六萬二千二百五十七兩四錢六分工稅銀七萬四千七百四十四兩九錢一分二共徵收戶工稅銀十三萬五千二兩三錢七分伏查本屆所徵戶工稅銀迭經設法招徠力爲整頓較之上屆收數雖有所增而按之昔年定額則相懸尙鉅蓋緣商賈情形一時驟難復舊兼之新闢添設貨稅又爲所分此收數之未能遽復原額實由時勢使然委非稽徵不力所致除將逐日徵稅數目並額支例銷各欸分造細冊檢同紅單另行遵限詳送外合將蕪湖關常稅一年期滿收數詳報請奏等情前來臣察核無異除咨戶部工部查照外理合恭摺具陳下部知之○庚辰予採運賑陝米石出力人員江西補用道朱昌琳等升敘有差○辛巳以許應鑠爲河南按察使○飭廣儲司墊發例給京師貧民棉衣實銀三千六百兩○諭前據都察院奏主事楊恩海等呈進伊祖楊景仁所輯籌濟編二函當交南書房翰林閱看據稱是書於荒政事宜極爲詳備實爲有用之書並據楊恩海

等呈稱是書現在本籍開雕將次竣事著沈葆楨吳元炳俟板片刊竣酌量刷印若干分寄行各省用裨
荒政所進原書著留覽○賞給中城朝陽閣東城臥佛寺育嬰堂南城打磨廠西城長椿寺觀音閣同北
城圓通觀梁家園各粥廠自十一月初一日起每月粟米三百三十石○壬午諭楊重雅奏擊散滋事賊
匪特參帶勇將領一摺本年五月間廣西懷遠縣白果村地方有齋匪伍開先等糾黨起事當經拿獲夥
犯審辦七月間伍開先糾約黨與復敢誘脅民苗潛回該村滋擾經該縣知縣分派團練營兵奮勇攻擊
斬獲匪首覃富明並斃匪多名立將白果賊巢焚燬辦理尙爲迅速惟匪首伍開先在逃著楊重雅督飭
派出各營會同地方官趕緊拿獲以絕根株駐紮該處之副將楊子吉於伍開先將回竄該村時毫無覺
察惟係陳營勇勞績實屬庸懦欺飾楊子吉著卽行革職仍責令隨同派出各將領設法搜拿務將匪首
弋獲倘始終不知愧奮再行嚴參懲辦毋稍寬縱餘著照所議辦理○丙戌上詣 慈寧宮行禮○祭
奉先殿遣載治行禮○諭前因丁寶楨奏創辦黔陽鹽務片內有語意重複及篇幅不接之處當令該督
明白回奏茲據奏稱前於奏片內繕寫錯誤漏未更正實屬疏忽自請嚴議等語丁寶楨著加恩改爲交
部議處○丁亥以夏同魯兼署吏部左侍郎宜振兼署刑部左侍郎○以嚴桂兼署禮部尙書○諭丁寶
楨奏拿獲謀逆匪徒請將出力各員獎勵等語匪首吳才標糾合夥黨在四川貴州湖南邊界處所往來

滋擾復敢妄造逆書謀爲不軌經丁寶楨飭令道員唐炯等督軍圍捕當將該匪等擒獲湖南龍山縣屬八面山有匪徒楊大郎等勾結擾掠署四川西陽州知州李承鄴調帶團練兵勇前往捕拿殄擒匪黨多名仍著丁寶楨督飭各該員弁務將在逃餘匪搜捕淨盡毋任漏網所有此次出力之道員唐炯著賞加隨帶軍功二級提督周萬順遊擊彭成泰署西陽州知州李承鄴均著賞加軍功三級以示鼓勵○以錫顥爲駐藏辦事大臣○戊子諭沈葆楨奏請將總兵開缺留防等語張從龍著開缺留於滄徐一帶督辦防務所遺雲南騰越鎮總兵員缺著李文益補授○諭沈葆楨奏請將不守營規之總兵革職永不敘用等語記名總兵陳凌家在甌聚賭實屬不守營規行同無賴著革職永不敘用以示懲儆○諭文格奏開州民搶漫水下注東境現已宣洩消退一摺黃河北岸因上游直隸開州民搶決口被水漫溢經文格飭屬防護宣洩水已消退濮陽各州縣猝遭水患情殊可憫著文格查明被災地方分別賑撫毋令失所並飭該州縣將淤出之地酌發籽種俾得及時耕作其連口外護堤著該撫督飭該管營縣實力修築以資捍禦開州民搶決口處所著李鴻章飭屬趕緊堵塞毋稍延緩○庚寅銘安奏弭盜之方固在整軍講武而端本之治尤在察吏安民誠以吏治興軍務相爲表裏未有不講吏治而能清盜源者也吉林盜賊充斥師久無功夫豈賊勢難平而兵威未振哉蓋流賊之蔓延此拿而彼竄愚民之濡染習慣而性成

不端其本而僅治其標徒恃武功未可以肅朋黨去殺也奴才自前歲冬間查案來吉回奏後會同前署
盛京將軍崇厚議奏辦馬賊禁賭設民官查荒地四條迭奉 諭旨醇諄以吉林地方積弊甚深而宜
力圖整頓 命奴才署理吉林將軍將所奏各節與崇厚妥慎籌商奏明辦理仰見我 皇上宏謨廣遠
聖慮周詳奴才具有天良敢不竭盡愚忱以副勵精圖治之意到任後遵將地方情形細心體察博訪
周諮查吉林省西自威遠堡門東至俄界不下二千餘里北至黑龍江交界南至鴨綠土們兩江源又不
下二千餘里溯維 國初寧古塔所屬各城惟我旗人聚族而居自道光初年將軍富俊屢議開荒內地
遷流如水歸壑數十年來吉林民人之多不啻數倍旗人良莠本自不齊梗頑因以成俗甚有窮鄉僻壤
聲教不通土棍強豪自爲家長其間強弱相併大小相凌殺人放火既視爲故常拒捕抗官遂成爲積習
蓋以司牧之官惟省城西北一隅設有三廳三廳之理事同知通判向由京秩旗員揀放雖間有長材而
初膺外任歷練未深往往艱鉅乍投茫然無所措理但假於幕友丁胥之手繼或刁生劣監要挾把持而
莫能制至阿勒楚喀三姓寧古塔等處命盜戶婚則就理於協佐衙門協佐等官但習騎射不惟不諳吏
治且多不通漢文悉憑委筆帖式司達等任意軒輊歷任將軍止以武事爲重吏治多未講求所以民怨
沸騰鋌而走險近年以來民愈窮而愈悍賊愈勦而愈滋峻法嚴刑人無畏志是皆不揣其本而齊其末

不清其源而塞其流也現在大股賊匪已平金廠渠魁授首逃餘孽尙多潛伏深藏而墾地採藥捕牲各項游民非內地遷流之戶卽亡命不逞之徒若不亟設民官劃疆分治政刑以化其頑梗教養以遂其生成專恃武功擷取失宜不惟重煩兵力且恐若火燎原益難撲滅又况甯姓所屬密邇邊陲更宜安集拊循查泰省官制經前署將軍崇實奏請增改稽章後吏治民風大有起色是因時立制原無歷久不變之規而正本清源乃見俗美化行之效奴才與崇厚體察情形迭經往返函商意見相同并集所屬文武紳耆悉心討論皆以爲地曠人多非有地方親民之官不足以資治理奴才再四思維與其拘守成規循途而覆轍曷若權宜時勢改弦而更張擬請以所屬尤爲衝要之區酌中設立廳縣佐雜等官並將吉林廳升爲府治長春廳通判改爲同知俾資治理將來民地錢糧旗民詞訟專歸該廳州縣管理其協佐防校等官止准管理旗務防剿盜賊不准仍預地方詞訟以示限制而一事權惟添設廳縣則創葺城垣建修衙署倉庫監獄等項及官員廉俸薪役工食所費不貲當此庫儲支絀之時斷不能另請撥款祇有就地興利以本地所籌供本地所需但吉林地瘠天寒庶物本不豐草商賈亦甚蕭疏松花一江不通海船既無船稅可收復無鹽釐可辦較之泰省尤爲枯窘且當凋敝之日正宜與民休養若操之太急祇圖遷就於目前或致貽弊於日後是以生財之道必須因地以制宜不敢膠民以敝怨現已派員前往樞梨廠

馬延河阿克敦城一帶查勘荒地照章改收押荒並飭各屬仿照奉天章程試辦斗稅擬以斗私荒價二
款作為添官一切用度將來廉俸工食並各項用款亦由斗稅荒租項下動支惟試辦斗稅查丈荒地必
須明幹廉潔之員方能有利無弊現在各省辦理軍務及地方各事奴才前調之員不敷分遣亦不敢多
調人員致礙經費荒務稅務祇可由近及遠以次興辦所有擬添之官須俟款項籌有端倪方能陸續添
設一二年內恐難設齊謹先擬定大概章程另繕清單恭呈 御覽伏候 聖裁至旗民衙門應辦事宜
並府廳州縣應定界址及各官廉俸書役工食添設綠營兵額口分一切詳細章程俟奉到 俞允後奴
才選派通曉政體之員前往各屬查明戶口地畝數目相度地方形勢詳慎斟酌奏明辦理其各屬州縣
員缺應俟何處地畝斗稅辦有成效即先奏派委員前往該處試署並撰擬城名隨時奏請 飭部頒發
印信以昭官守再吉林三屬向因專管旗人戶婚各事皆用理事人員今既民戶眾多政務殷煩與從前
情形不同應請與新設之同通州縣均照奉天新章加理事銜滿漢兼用以廣材路其寧古塔瑤春二城
距省較遠應否設官分治及吉林將軍應否仿照奉天將軍加兼文銜並省城地方應否添設巡道之處
容奴才隨時體察情形再行奏明請 旨遵辦下部議奏○辛卯諭上年十一月間曾經降旨諭令各部
院堂官常川進署不得後時以為司員表率近來召見各部院堂官屢經詢問每以逐日到署奏對乃詳

加訪察仍復相率因循或數日進署一次或到僅片刻虛應故事漫不經心遇有應辦稿件輒令司員奔走私宅或在朝房晝夜俄頃之際豈能詳細請求該堂官等皆受國厚恩淳陟崇階理宜激發天良力圖報稱乃不意怠惰自甘罔知振作朝廷訓諭視為具文以致公事仍多積壓弊竇未能盡除玩愒成風殊堪痛恨嗣後各部院堂官務當懷遵節次諭旨痛除積習勉從公常川進署將應辦事宜互相商榷期於措置咸宜無負朝廷勤求治理誥誥諄諄至意將此通諭知之○賞給官紳捐建之東城南海會寺玉清觀剎廠及興善堂煖廠小米一百五十石○癸巳賞翁同龢托雪在紫禁城內騎馬○賞王文韶成林在紫禁城內騎馬○甲午諭涂宗瀛奏拿獲誘賣婦女匪徒就地正法一摺豫省連年荒旱民間蕩析離居安輯流亡猶恐不及乃周家口匪徒李長和即李小泉膽敢將逃荒婦女誘拐搶奪抑勒逼賣並恣意污辱實堪痛恨現在涂宗瀛派練軍前往查拿將李長和及王輔清等七名擒獲起出婦女四十餘人審訊明確立將匪首李長和正法場示仍著該撫悉心查察倘再有此項匪徒立即嚴拿懲辦餘著照所議辦理現在各省流民尚多難保無此等情事著該督撫隨時認真查拿嚴行究辦毋稍疏忽○諭前任烏魯木齊都統英翰選樞現已到京著派員勒載徵帶領侍衛十員前往奠醴用示篤念舊臣至意○諭工部奏請飭催山東迅解生惠銀兩一摺工部現在恭辦 穆宗毅皇帝梓宮 孝哲毅皇后梓宮永

連泰安 山陵要差備款孔殷所有山東歷年欠解生息銀五萬二百五十兩著文格飭令運司趕緊籌撥倘一時不能全數起解即行迅撥銀二三萬兩務於年前解交該部以應要需○頒給河南 河神廟匾額○京師雪○乙未賞給京師八旗綠步各營官兵一月錢糧○加賞 寶錄館人員例支柴炭外三月銀兩○諭西甯辦事大臣豫師奏目疾加劇請開缺回旗一摺豫師著准其開缺回旗調理其所署之烏魯木齊都統著恭銳署理○山東巡撫文格奏戶部議覆御史胡聘之奏請嚴禁燒鍋並直隸督臣李鴻章奏請暫行停燒各等情一摺請 飭下河南山東陝西各巡撫查明各地方燒鍋情形能否禁止由該撫等自行具奏 旨辦理等因奉 旨依議欽此○召行到東奴才接閱之下反覆詳察竊謂養民莫先於厚生而用法宜防其滋弊北省災荒屢告民食維艱自應嚴杜消耗以資補救胡聘之李鴻章所請各節皆急切救荒之計實於民食有裨惟各省情形多有不同就山東而論似驟為禁絕不如漸為轉移也因查部臣議奏內稱禁之而不得其道則利民轉以病民又稱操之過促流弊太多擬請將直隸各屬燒鍋商戶自光緒四年以後但許歇業不許新開等因洵屬酌中定議緩急合宜奴才前准部咨當即檄行藩司遵照查明東省各屬燒鍋能否一律禁止有無窒礙迅速詳覆茲據該司詳稱東省於同治三年曾經通飭各屬確查開設燒鍋坐數造冊呈報擬即示以限制嗣因各該州縣造冊未齊以致未能核實

額數而隨時查訪倘無任意私燒情形核與部臣所議自光緒四年以後不准新開燒鍋用意大略相同
奴才詳加查核燒鍋之利倍於尋常食用之物雖私燒例應治罪而究不能重科小民惟利是圖幾不知
有干法令驟行查禁驅擾必多現與司道籌商一時縱難禁絕亦應設法稽查擬俟各屬造冊報齊山司
頒發諭帖收執以杜朦混嗣後但許歇業不准新開即使年穀順成亦不得藉端變法該地方官仍應親
加查驗如有頂冒暗充及無帖私燒者即行從嚴封禁其歇業者飭即隨時繳帖倘敢因循迴護查出分
別撤參如此逐漸而行庶幾農商兼顧既免增燒之弊復無紛擾之虞行之日久則燒鍋漸少儲糧自多
於國計民生尙有裨益報聞○丙申諭旨昌著賞給副都統銜作為西甯辦事大臣○丁酉諭本月二
十八日平撒郡王安葬園寢著派恩祿王奕祥前往代朕祭奠○諭李鴻章閩撤銘曾國荃奏晉省連年
荒旱請將辦賑出力各員准照海運河工程程分別獎叙一摺晉省荒旱頻年迥非尋常偏災可比一切
賑務較他省實屬繁難辦理不善各員業經降旨從嚴懲辦其實心任事者自應優加獎叙以昭激勸所
有承辦山西賑務人員無論外省及本省著各該督撫等於事竣後擇其尤為出力者准照海運河工程
程分別保獎毋許冒濫他省不得援以為例○戊戌諭吳贊誠奏病勢增劇請開署缺一摺光祿寺卿吳
贊誠著開福建巡撫署缺仍督辦福建船政事宜○以裕寬為福建巡撫○己亥諭何璟等奏臺灣後山

番社悔罪自投請將出力之提督獎勵一摺福建臺灣後山加禮宛等社番衆滋事經官軍擊敗後悔罪投誠並將姑乳斗玩一名緝獻正法各番社現已一律安帖辦理尙爲妥協記名提督福建漳州鎮總兵孫開華赴剿迅速尤爲出力著賞給白玉柄小刀一把白玉四喜搬指一箇大荷包一對火鏢一把以示鼓勵其餘出力員弁著准其擇優彙案保獎○調德馨爲河南按察使許應鑠爲江蘇按察使○以成孚爲河南布政使金國琛爲廣東按察使○庚子諭御史段福昌奏訪聞江西殉難各員請飭議卹等語江西都昌縣從九品銜查維新崇仁縣訓導段凌雲候補訓導萬方安或力戰捐軀或被擄遇害均堪憫惻該御史籍隸江西見聞較確所有殉難之查維新等均著交部議卹○諭軍機大臣等御史曹秉哲奏請仿用西法開採以利器用一摺據稱近來各省開設機器等局需用煤鐵甚多請由內地仿照西法用機器開採轉運鼓鑄製造既省買價並濬財源等語所稱招徠殷商聽其開辦酌量徵收釐稅是否可行著李鴻章體察情形斟酌妥籌奏明辦理原摺著鈔給閱看○以許應鑠爲內閣學士○壬寅以啟秀爲內閣學士○諭四川東鄉一案丁寶楨李宗羲所奏情節不符著恩承宣華卽將此案詳細查訊秉公議結據寶其奏稱使水落石出情真罪實不得稍涉含混摺片呈詞均著鈔給閱看○癸卯湖南岳州鎮總兵彭昌福致仕以陶立忠爲湖南岳州鎮總兵○諭黎培敬奏懇請陛見一摺黎培敬著來京陛見貴州巡

撫著林肇元暫行署理○甲辰以崑岡兼署刑部左侍郎○梁俊奏輒維生財之道不外乎開源節流邇
年以來經費支絀於是議節財流則減官俸之成數改旗餉之放章議開財源則勒捐之章日新抽釐之
卡日密乃財愈理而愈虧用愈節而愈竭國家需用鉅款每不得已思借洋商其弊尤爲無窮不堪設想
此不可不通盤籌畫者也○以爲富國之祿在大經不在末務救時之要貴實力不貴虛文大經者何額
徵之錢糧是也我朝全盛之時部庫所儲足支數十年各省藩庫亦皆充實無虧其時不尙極宜補苴
之術惟於正額錢糧力加經理遂能臻豐亨豫大之盛今則聞各省虧空正雜錢糧大省不下百餘萬小
省亦不下數十萬自光緒元年恩詔豁免以後現在積欠既不在民又非無著若勒限屢追不難日有
起色當事者不此之務而惟請求變通苟且之術以冀補救於萬一臣所謂末務者此也實力者何督撫
之整頓是也各省大吏於所屬州縣虧短庫欸非不知之甚悉乃瞻徇隱忍不肯自簡從事間有參劾往
往係已故之員其所虧短亦係數年以前之欸也此數年中道府既不稟揭藩臬亦不申詳遲之又久始
以一奏塞責追請旨查抄備抵自謂可懲一戒百矣然服官省分既苛徇隱於前本籍官吏雖保不通
融於後不過取其家產盡絕甘結即可完案是徒有查抄之名並無備抵之實而盈千累萬之正供從此
作正開銷矣臣所謂虛文者此也方今各省督撫不乏勤幹任事之員又皆受恩深重自宜力思報稱

何以因循玩忽至於如此推原其故總由陋規未能盡革屬員易持上官之短長上官恐爲屬員所揭控故容之於生前以免反噬參之於身後以示無私其用心亦太巧矣臣以爲大法然後小廉近年封疆大吏中惟前任山東巡撫閻敬銘革除陋規清查交代維時東省藩庫因以充裕而吏治亦爲一變各省似皆可仿照辦理相應請 旨飭下各省督撫振刷精神破除情面咨取閻敬銘所辦山東成案實力舉行不得以參追一二已故之員遂爲盡職並請 飭下吏戶二部嚴定延不完繳飾詞搪塞處分以及虧空病故年分著落賠交實銀庶州縣有所警惕而上司不至徇庇矣 上諭御史梁俊奏州縣官錢糧虧空宜及生前參追以重庫欸一摺據稱前任山東巡撫閻敬銘革除陋規清查交代藩庫因以充裕吏治亦爲一變各省皆可仿照辦理等語著該省督撫振刷精神破除情面咨取山東辦理交代成案實力舉行不得以參追一二已故之員遂爲盡職其所請飭部嚴定虧空章程之處著該部議奏

○梁俊奏 臣風聞魯豫二省被災各州縣官往往借善後爲名籌辦社倉義倉各事並聞立有急公社名目預徵來年錢糧其稟報上司總以百姓樂輸爲詞而實則敲朴追比以遂其浮收冒銷之私臣以爲大災之後百姓瘡痍未平呻吟未息憐猶初飛之鳥不可拔其羽新植之木不可搖其根不惟擾民之政不可舉行卽意在利民而仍須借資民力如誠倉社倉諸事亦宜緩辦惟應嚴除弊端以休息爲生養之計

查今日宜除之弊端不一而足其弊之最大又屢經臣工條奏迭奉 諭旨禁革而究未能悉除者則莫如漕糧之浮收車馬之濫派官價之抑勒詞訟之規費各項需索無不僭於正賦倘爲小民減一分差徭卽爲小民增一分蓋藏此古人所謂多一事不如省一事也臣聞山西流民逃於歸綏口外以及天津保定河南流民逃入江蘇之淮徐安徽之鳳臺山東之曹濟現計不下十餘萬自五月以後各省皆有資遣之令晉豫亦有招集之策其所以甘爲離鄉之乞丐而不敢爲本籍之農夫者未始非因差徭太重故也臣籍隸河南懷慶府界連山西晉豫吏治聞之頗詳大率上司之所謂能員百姓之所謂酷吏百姓所控告之人卽上司所保薦之人無怪乎荒地至今未墾流民至今未歸也臣目覩時艱補救無術但願培養元氣與民休息相應請 旨飭下山西河南各巡撫慎選循良之吏無信操切之員查明某縣某項陋規應行禁革某縣某項浮費應行刪減實力奉行開單覆奏並將禁革刪減各名目勒石通衢俾民周知不准僅以告示一紙塞責庶民困可以稍蘇而邦本於以永固 上諭御史梁俊奏風聞晉豫被災各州縣官每借善後爲名籌辦社倉義倉各事並立急公社名目豫徵來年錢糧凡漕糧之浮收車馬之濫派官價之抑勒詞訟之規費弊端不一請飭查禁等語山西河南地方當此災荒之後各牧令宜如何妥爲撫卹休養民生若如該御史所奏亟應嚴行整頓著各該巡撫查明所屬各項陋規及一切浮費分別革除

刪減務期有益閭閻其禁革刪減名目應如何切實曉諭俾小民周知之處並著飭屬認真舉行毋得虛
應故事○乙巳岐元清凱恩福奏秦省於道光二十四年奉 旨清查荒地經前任將軍等擬定條款委
員妥辦嗣據旗民人等陸續首報查明給領升科有因捏報他人墾熟地畝與原主互相爭領以致控案
滋煩查定例各直省荒地無論土著流寓俱准報墾倘指他人承墾之地冒認己業者依律治罪又奉天
旗民墾種餘地予限二年首報限滿不報者准鄰首發又自首私墾餘地如係紅冊地旁滋開之地准
業戶作為己產若係另段私開及納稅餘地邊開出之地仍交原佃承種如無力耕作報官招佃等語詳
核例意無論何項地畝已經開墾成熟應歸業主原佃本極詳明准地鄰首發並無給領明文他人更不
應捏報冒領惟因清查時原擬條款內有私開地畝逾限不報准令他人首報之語是以一經首報即歸
承種貪利之徒藉此心生覬覦妄思攘奪爭先捏報與原墾之人互相爭競搆訟連年甚至械鬥逞兇釀
成命案無辜拖累流弊滋多若不申明定例終無息訟之時奴才等悉心商酌遇有首報生荒者仍照定
例暨向辦章程查無關礙無論何人但准承領其已墾熟地亦照定例係紅冊地邊滋生者歸業戶承領
另段私開及納稅餘地邊滋生者歸原佃承種查明照例升科如敢隱匿不報准地鄰首發或官查出即
行入官招佃他人首報概不准其承領未結控案分別核斷註銷庶足息訟端而安農業報聞

東華續錄

光緒二十五

臣朱壽朋敬編

臣章士璩恭校

十一月丁未諭黃偉具奏謝恩並陳經過地方情形各摺片內未一行奏字均未擬寫殊屬不合著交部察議○賞給通州王恕圖等處粥廠米石○命奎潤恭懸 惠陵匾額○沈葆楨奏議修揚屬運河東堤俟有續款可籌兼將西堤擇要勻年興工得 旨著督飭道員龐際雲等確實勘估先將東堤趕緊修築以資保障○戊申沈葆楨奏請安徽世職俸銀仿照江蘇奏准章程酌定額數允之○己酉以防護河堤功予曹州府知府樊希棠等升叙有差○梅啟照奏遵查辦理浙江盜匪情形得 旨未獲盜犯著該撫勒限嚴拿按律懲治並認真請求捕務以清盜源防營勇丁務當力加整頓嚴行約束毋任滋生事端○允左宗棠奏克復新邳北路各城案內部駁武職劉士俊等仍照原保給獎○庚戌諭前據果勒敏奏調任杭州副都統富爾琿未奉諭旨自行署理仁浦副都統原缺並於用印事件不照向章鈐用將軍之印當諭令富爾琿明白回奏茲據奏稱該副都統於八月初五日到杭州副都統調任先於七月二十五日咨詢果勒敏仁浦副都統印信應否擇員護理至八月初三日始接回咨仍未將咨詢情節分晰見覆追

初七日續接該將軍咨回暫行代理之文已在列銜奏到新任仍署前任之後因未離任將到任奏咨事件酌用乍浦副都統印信等語當爾葆到杭州副都統調任後其乍浦副都統印務應暫行代理乃率用署理字樣殊屬非是果勒敏咨復遲延亦屬不合均著交部議處○辛亥閏敬銘曾國荃奏 旨查明太平曲沃二縣辦理災務並無營私情弊報聞○裕祿奏請以熊湖常關泥汶稅口改移馬口地方設關稽徵允之○王子李瀚章藩臬奏武昌縣樊口地方內通梁子湖周圍八百餘里匯於一口出江載在
大清會典一統志 欽定明史地理志諸書數千年從無議建開壩之事同治元年武昌縣知縣龍雲始據紳士稟請築壩前撫臣嚴樹森以此壩一築水無分洩大江兩岸必別有沖決之患嚴飭不准三年紳士等復中前請前督臣官文以水漲之時內外沖激開壩斷難支持必有損於堤工顯為斂費肥己起見立案不行六年前撫臣曾國荃以前此師次黃州採訪輿論如在樊口築壩係附近西陽二坂田廬受益而內湖積水則無消路各邑被淹必廣樊口與鄰境同係 朝廷赤子豈能損彼益此飭縣嚴禁前升任布政司臣何璟以樊口修建開壩如果有利無害數百年來何竟無人議及該紳民欲派費於附近六縣從中漁利勒捐商船索取開費膽敢懸旗斂費擅自興工要挾實屬目無法紀其平日刁悍強梁概可想見飭將已修工段平毀出示永禁此歷任辦理情形也光緒二年前撫臣翁同龢接准京官公函議

建開闢委員擬勘以此處興建利少害多重申禁令廩生郭瑞麟等抗違不遵糾眾強築將河堵塞並私立埠頭抽收船盤把持勒索臣瀚章回任後迭經受害紳民控告並該管府縣查明商民被擾及郭瑞麟等藐抗情形派營查辦事關通省水利未便稍事姑容故檄調兵勇將該處私壩創毀奏明嗣後樊口地方永遠不准建築開闢欽奉 諭旨轉行遵照今歲春間突有革生胡炳盧汪繼元等家無田產但冀盤撥獲利糾眾復築鄉民有不願者立將房屋燒毀始而不服地方官彈壓甚至捆捉縣差戕害勇丁形同叛逆不得已派營前往查拿始各解散此臣等先後辦理情形也竊維湖北之水江漢為大江水自巴東縣入境漢水自鄖西縣入境分流千餘里至漢口而合流其勢浩大外則支河港口內則巨澤重湖節節碁布尾羅足為分殺停滯之地使之紆徐委折遂漸東趨故前史所載水患稀見自後世與水爭地設堤防以禦之水道日窄然沿江沿湖亦祇有順水直堤從無堵水橫壩歷考名臣奏議留心湖北水利如阿桂汪志伊等均以疏濬支河為要凡宣洩積水之路被居民阻塞者乾隆五十三四等年迭奉 諭照例嚴治其罪並飭勒碑永禁伏讀道光十一年 上諭本年湖廣等省水漫成災如果平日講求水利江湖通暢何致釀成水患著於懷臨江湖地方詳加履勘如有壅遏水道之處必當設法查禁使漲水得以宣洩則害除而利可興等因欽此此外欽奉 諭旨甚多不能備錄煌煌 祖訓深切著明誠 帝王經世

之宏謨萬古不易之準則也樊口地方外江內湖爲古來洩水要道山川如故並無變遷壅塞其流爲害滋大惟口內西楊坂一帶周圍三十餘里建閘以後田禾受益較多該處居民紛紛訴請白端後聽臣瀚章亦幾爲其所搖迫屢次親歷其地察其形勢復博訪周咨通籌全局始知建築閘壩其害有五謹爲

皇太后 皇上縷晰陳之樊口內包湖澤九十有九其源甚遠其浸甚廣每逢春夏各縣山水畢匯於湖僅恃此一綫之口以出江江水盛漲之年亦倒灌而入內外相連汪洋一片卽至冬令水涸口門尙寬二十餘丈壩固爲害開亦無益議者乃謂築壩湖水無出勢不可行築閘以時啟閉可資消洩不知樊口係兩面受敵之地既須洩出湖水又慮灌入江水豈能兩全況下閘必在桃汛以前放閘應俟霜降以後此數月中如大雨時行諸湖有漲無消漫溢何可限量無論向來各州地春收豆麥悉付波臣卽湖數百頃稻田亦必盡遭淹沒受害之家歸咎於閘勢必此築彼毀械關相尋巨案迭出是不建閘僅止水大年分江水倒灌入湖盛夏不無可慮建閘卽水小年分湖水亦無消路妨農病稼歲以爲常甚至激成事端其害一也江水經由之道驛之人身湖河港汊猶四肢之脈絡所以宣行血氣也今堵塞湖口是截去肢體僅留胸膈也胸膈不快頭足皆病口不能洩則尾閘洩之沿江各堤雖不能指定南岸北岸要之川壅必潰理有固然嘉慶年間監利之水港口沔陽之茅江口皆因橫堵一堤上游石首江陵大受其害近日

修改吳家口遂溢於大門之岳口是其明證樊口爲江漢合流以後南岸洩水首區一經築壅則上下堤防皆有岌岌可危之勢其害一也樊口內湖之民農漁半漁有應完之魚課虛課農有額設之地丁漕糧向係一律徵徵調查同治元年至今十六年中僅止三年蠲緩歷有成案可稽足見水小之年湖水消洩入江江水不致滯入仍可豐稔豐收建閘後江魚不能入湖漁利全無卽農田因積水難消亦耕作俱廢不特正供無著而此無數失業窮民何以爲生又沿湖市鎮林立該口帆檣上下百貨流通釐收最旺門口一堵舟楫皆停課山何出惟西楊坂附近居民縱禾稼被淹仍可踞埠頭以恣勒索坐獲其利徒感民生實無裨國計其害三也鄂中爲天下咽喉樊口乃省城後路自來論形勢者江夏與武昌並重咸豐年間鄂省三陷三復軍械饒裕多轉運於梁湖建閘後湖內淤泥隨流下注壅積口門數年後愈聚愈高閘將淪爲平地萬一有事征兵輸餉必須泝江而上屯儲無所運調不靈失地露軍兵家切忌我朝廷際隆平固無慮此而閘內湖水盛積一旦沛然橫決下游鄰縣之民蕩析離居皆意中事其害四也大江兩岸如新灘口沌口金口沙口陸家口富池口等處悉皆江湖以通與樊口情形無異居民屢請堵築迭經據理駁斥如樊口建閘雖有他處不得援以爲例之諭旨而小民何知必謂利害相同形勢相似何以辦理兩歧難免怨咨交作且見樊口之民恃強橫暴官遂准行萬一相率效尤糾衆逞凶肆無忌憚必

盡堵諸口而後已江水建瓴而下孤行數千里兩旁無可停滯無可宣洩幾波劇悍一瀉無餘下游數省之田廬何堪設想其害五也以上數端灼然易曉在創議築閘者耳聞目見不過樊口附近之一隅耳等所慮者實繫乎通省之水利東南之大勢是以奸民衆訟將及念年歷任督撫屢嚴禁於先等復力持於後無非欽遵 列聖諭旨循守歷辦章程又慮西楊坂一帶地方時受水災曾於上年奏明准於口內兩岸添築直堤以資保衛區區經畫之苦心初不敢求諒於衆人亦不敢自明於 君父惟受 恩深重忝領疆圉倘欲見好愚民爲敷衍目前之計或因廷 臣論奏遂於將來變故不爲先事陳明則獲戾滋大矣 上諭前據彭玉麟奏遵查湖北樊口地方宜修補大堤建築石閘當照所請諭令李瀚章等飭屬辦理茲據李瀚章等奏一面飭議舉行並稱樊口建閘惟於西楊坂附近一隅有益而江湖盛漲之時皆難宣洩有害通省水利等語所奏亦不爲無見惟建築石閘究非堤壩可比但當察看外江內湖水勢消長以時啟閉既可宣洩盛漲又可保衛田廬未始不可兩全該督等所稱下閘必在桃汛以前放閘應俟霜降以後利病若何仍准隨時體察具奏○癸丑總理各國事務衙門奏新嘉坡設立中國領事應給俸薪援照章程成案酌核辦理查上年出使英法大臣郭嵩焘奏定設立新嘉坡領事諭知胡璇澤允發開辦經費旋准胡璇澤具報已於本年二月十九日開辦其領事薪俸應照奏定出使章程內開正領事月給

薪俸銀五百兩之例按月由郭嵩焘發給新嘉坡領事胡璇澤照數支領胡璇澤通曉西洋語言卽毋庸添設翻譯以歸節省至領事官需用文案委員之處查臣衙門前報復郭嵩焘等奏隨帶人員摺內聲明出使章程祇有隨員醫官並無文案名目請將該大臣等隨帶之文案作爲隨員按月照俸薪銀二百兩之數支給現在新嘉坡領事處需用人員未便創立文案名目應令查照奏案將文案委員作爲領事隨員照出使大臣隨員月給俸薪銀二百兩之數酌減每月給予俸薪一百六十兩稍示等差該領事應用隨員名數仍由該大臣核定後咨報臣衙門查核所有領事及隨員等俸薪等項均自開辦之日起又統於該大臣出使經費內發給仍彙入一年期滿奏銷冊內一併列款請銷至該處所收身格紙費等項臣衙門前咨復郭嵩焘以現與日國有議訂招工章程華人前往新嘉坡可按此章程商辦所有出洋身格紙費無庸另議以歸一律惟出洋船牌費一項各國征收有無異同轉飭胡璇澤詳細稟復應令該大臣查照前咨卽飭胡璇澤將船牌費一節迅卽查明稟由該大臣咨復臣衙門核辦併令該大臣飭將該處每年所收船牌費若干抵支開辦薪俸等項不敷若干再有出使經費內撥給以昭核實得旨如所議行○甲寅諭李鴻章奏審明村董捏戶侵賑差役藉端索費各案分別訊結一摺直隸交河縣董事江慶雲於上年辦理各賑時經該縣知縣派令查戶放糧竟敢捏造戶口侵吞賑糧十四石有奇膽玩已極該

犯雖已病故俾逃竄戮仍著李鴻章飭屬於該犯家屬名下追繳糧石毋任玩延該縣知縣徐城失於覺察業經革職著毋庸議元城縣知縣孫望於差役徐得夏因案索取規費經紳民常囑盛等控告乃提研時不向徐得夏嚴切根究輒因原告頂撞遽行重責鎖押且平日於應貢之人任性苛虐甚至縱役飲法業經革職著永不敘用以示懲儆○左宗棠奏臣伏讀 諭旨伊犁在昔爲西路第一重鎮俄人交還以後如何防守未交以前如何布置伊犁九城縱橫相聯大城西南北三面舊有卡倫距俄境若干道路俄軍紮至何處金順現駐庫爾喀喇烏蘇前隊西至何處臣謹按俄人自據伊犁於西面舊有拱宸瞻德廣仁塔勒奇四城均棄而弗守傾地殆盡綏定一城近以之雜置陝回距伊犁僅三十里伊犁大城人煙甚少俄兵及商戶均萃居東面惠寧縣春寧達三城而金頂寺煙戶尤多伊犁管事俄官名馬依爾品秩不過中國同知通判之類主伊犁之事者七河巡撫也七河一作七水其官爲固必納三爾其名爲喀爾帕科斯克依所駐阿爾瑪圖地屬俄境在伊犁西八百餘里其兼轄之官名圖爾齊斯坦總督名爲克復滿亦呼滿伏滿自稱俄國大臣駐浩罕故都搭什干城距我喀什噶爾不過數十程山喀什噶爾至俄邊納林河中隔俄屬布魯特部喀城馬行六日可至從前伊犁本不與俄境相連以哈薩克布魯特種人與浩罕所部安集延及布噶爾所屬爲之隔閡近年俄人先後誘誘哈薩克布魯特種人又攻奪浩罕三部據

其都城而浩罕屬安集延亦隨風而靡故我北路伊犁南路喀什噶爾之邊境皆與俄屬相接距俄境亦近也伊犁收還以後應於邊境擇要築壘開壕安設大小礮位挑勁兵以增其險至伊犁大城西北之塔勒奇順仁瞻德掛宸各城戶口鮮存水草卻便應各擇要隘暫駐各營分屯其間所有旗綠各營剩存兵丁各給牛種牲畜督令游牧耕墾舊有城堡緩議修復尙非不可大城以東惠甯熙春甯遠各城民戶商戶願遷徙者遷徙願歸業者歸業邊圍既奠人安其土耕其野而出其途者不待招徠迥非甘肅從前東路西路數百千里蒿萊滿望杳無人煙難於措置可比若烏魯木齊所屬各城相距甚遠難於照料此伊犁收還以後情形也伊犁未還之前金順大軍駐庫爾喀喇烏蘇其西精河地方勢處要隘向駐馬隊以資扼截自福珠哩歸後金順未及派紮填防致被漢回侵掠金順旋派馬隊二百前往填防當可無虞由精河西行一日爲永集湖再西數十里卽伊犁俄官所設之頭卡三日卽抵伊犁中間山徑五道可達伊犁不由惠甯熙春甯遠三城經過然巖谷幽邃僅容一人一騎行走不能通車若收還伊犁則驛道山徑皆成腹地此形勢變遷俄人現在布置官軍防守及距伊犁道里遠近大略也 諭旨郡縣之制以民爲本現由嘉峪關烏魯木齊至庫爾喀喇烏蘇迤西商戶回戶各存若干由吐魯番至南八城驛頭共存若干除舊有各屬州縣外其餘各城改設行省究竟合宜與否倘置郡縣有無可治之民不設行省此外有

無良策臣謹按新馴之變起於北路迪化失守所屬相繼淪陷戶口傷亡最多漢民被禍尤酷以逆回仇視漢民故也比大軍進剿連拔堅城而昌吉呼圖壁綏來回民又因畏剿逃奔南路煙戶頓減克復以來釐定安集招徠開墾戶口漸增迪化州各屬尤成效可觀舊額民戶共四千二百有奇現報承墾者已三千六百餘戶昌吉縣民戶舊共三千九百有奇現報承墾者僅四百數十戶阜康縣民戶舊有三千九十餘現報承墾者僅二百一十餘戶綏來縣民戶舊有三千七百餘現報承墾者八百五十餘戶奇台縣舊有民戶四千三百六十有奇現報承墾者五百七十餘戶濟木薩縣承所屬舊有民戶二千八百有奇現報承墾者三百五十餘戶呼圖壁巡檢所屬舊有民戶一千七百三十有奇現報承墾者二百八十餘戶庫爾喀喇烏蘇舊有民戶僅八十有奇現報承墾者尙數十戶精河舊有民戶四千有奇現報承墾者一百餘戶鎮西廳戶口無考舊種地六萬畝現報民墾三萬六千餘畝兵墾四千餘畝土客漸增此北路民戶現存實數也久罹兵燹戶口凋耗無怪其然鎮迪一道所屬雖子黎係存頻年散給耕牛籽種酌發賑糧廣示招徠自木壘河抵精河除戈壁外又均是腴區土客民人及遣散勇丁領地耕墾逐漸增加署鎮迪道周崇傳勤慎廉幹事必躬親漸有明效需之時日百堵皆興即以目前論之亦非無可治之民也吐魯番舊隸鎮迪道荒地尙少現委道員雷聲達署同知奎拔妥爲撫輯糧石租稅已逾舊額之半南八城

除英吉沙爾壤地福小烏什土性瘠薄餘均較吐魯番爲饒而喀什噶爾和闐葉爾羌阿克蘇庶而兼富
物產豐盈又較各城爲盛劉錦棠張曜悉心經理現委員開河引渠清丈地畝修築城堡塘站鑄錢徵隘
百廢肇興具有端緒較之北路尤易爲功是南北開設行省天時人事均有可乘之機失今不圖未免可
惜此新疆之應改行省者一也北路得之平部南路得之回部皆因俗施治未能與內地一道同風久已
概爲邊地伊犁設將軍又設參贊大臣一員烏魯木齊設都統塔爾巴哈台葉爾羌均設辦事大臣伊犁
等處設領隊大臣五員塔爾巴哈台烏魯木齊庫爾喀喇烏蘇古城巴里坤吐魯番烏什英吉沙爾均設
領隊大臣哈密設辦事大臣一員協辦大臣一員葉爾羌設兼管和闐事務協辦大臣一員烏什設幫辦
大臣一員喀什噶爾設換防總兵一員是邊地腹地地皆一律視之無甚區別與經野馭邊之義不符將軍
都統與參贊辦事大臣協辦與領隊大臣職分等夷或皆出自禁闥或久擢兵符民隱未能周知吏事
素少歷練一旦持節臨邊各不相下稽察督責有所難行地周二萬里治兵之官多治民之官少而望政
教旁敷遠民被澤不亦難哉北路糧員但管徵收而承催則責之項目南路徵收均由回目阿奇木伯克
等交官官民隔絕民之畏官不如其畏所管項目官之不肖者狎玩其民輒以犬羊視之凡有徵索項目
人等輒以官意侮取倚勢作威民之怨官不如其怨所管項目也內地徵收常制地丁合而爲一按畝出

賦故無無賦之地亦無無地之賦新疆則撥丁索賦富戶丁少賦役或輕貧戶丁多則賦役反重事理失平莫甚於此貨幣之制子母不能相權爭訟之事曲直不能徑達官與民語言不通文字不曉全恃通事居間傳述顛倒混淆時所不免此非官與民親漸通其情實去其壘蔽廣置義塾先教以漢文俾其略識字義徵收所用公票其戶民數目漢文居中旁行兼注回字令戶民易曉遇有外誤卽予隨時更正責成各屬州縣而道府察之則綱目具而事易舉頭目人等之權殺官司之令行民之情僞易知政事之修廢易見長治久安之效實基於此新疆之應改行省者二也夫立國有疆古今通義傳曰天子有道守在四夷周秦以前姑弗具論自漢以來通道始於張騫不能得月氏要領求馬繼以廣利不能下小國堅城漢於西域窮天下之力以務之卒有輪臺之悔故班固以爲得之無益棄之不爲損也今主棄地之說者祖之豈非不謂然顧斷斷於兵不可停地不可棄者蓋以地形無今昔之殊而建置則有因創之異窮變通久因時制宜事固有不容已者竊按新疆開拓肇自高宗時移涼州西安熱河滿兵延安綏德甯夏興安漢中西甯固原肅州河州安西綠營兵丁駐守南北兩路餉不外增各城養廉經費則以京口杭州等處出旗漢軍俸餉口糧馬乾及甘肅等處所減草料充之計內地每歲裁減之數共一百二十九萬兩有奇而調抵新疆養廉經費一百零七萬八千四百餘兩外尙餘銀二十一萬一千五百餘兩不特無糜

餉之度且有節餉之實論者竊以耗中事西疑之於 聖意拓邊節餉固無當也臣自度隴以來創留心稽考甘肅新疆餉數愈積承平時每歲約銀五百餘萬兩自變亂以來冊籍散佚難以擬接請部鈔示成案亦無以應近據藩司崇保詳稱查得道光二十七年甘肅口內外駐防滿洲蒙古旗綠官兵應需餉銀白費郵等項銀四百一十五萬二千三百五十三兩三錢九分九釐四絲一忽內先一年預撥銀一百四十萬兩外銀二百七十五萬二千三百五十三兩三錢九分九釐四絲一忽山部臣照依估撥預撥完數以此準之甘肅新疆實餉五百餘萬之數雖無可考而一歲之中預撥正撥四百一十五萬有奇則有數可稽也臣竊度南北兩路如有清丈之法就徵賦仿什一之制而從寬定額民收十數分官徵其一以給軍食尙可有餘修築溶流以備旱潦改鑄制錢以便民用設局徵釐以裕課稅創設義塾教之識字選調匠師教之藝事自季春至今次第經理甫有端緒客俟各處織造取齊即行具奏此外南北兩路物產尙有藥材皮張吐魯番之棉花和闐之玉庫車之金銅鉛鐵均應設籌及之是新疆利源非無可開也甘肅地處邊陲土曠人稀瘠苦甲於天下承平時錢糧徵收不及東南一大郡此其明徵亂後子黎皮骨僅存氣息倖屬雖頻年拊循休養漸有起色究之致力多而成功少者時地實有以限之通省舊設額兵太多全恃各省協款接濟自中原軍興各省未能兼顧於是回禍起新疆淪陷甘肅全省名雖保存實則

亡矣幸值 聖明在上洞鑒無遺移東南之餘財救西北之奇厄親賢夾輔內外一心先關內而後關外次第圖之乃有今日不可謂非幸也此時所當亟籌者善後之策善後之策當規久遠利鈍所繫匪僅一時以甘肅與新疆並論新疆利源可用流亦可節甘肅則開源爲難而節流尙有可議從前額兵之多者一則轉輾與蒙部回番雜處兵少恐散戎心一則新疆需由內地撥兵換防兵少難敷調派也若以現在局勢而言蒙部回番已就鈐束防營可以漸減前奏改行餉爲坐餉圖節勇餉爲復甘肅制兵之漸新疆南北如置行省換防之制可以永停又擬節制兵之餉以紓各省協款之力也竊計甘肅新疆承平時預撥佔撥餉銀四百數十萬兩俟伊犁收還每歲約可節省百數十萬兩後此利源日增餉更可減部臣可隨時察酌而任甘肅新疆之事者可隨時陳奏特恐非微臣所及見耳此統籌甘肅新疆節省餉需以規久遠之大略也 諭旨宜於萬難措施之中求一可進可退之計臣愚竊以爲新疆歲需餉銀二百數十萬兩甘肅歲需餉銀二百數十萬兩本是承平時部臣預撥佔撥常例茲當全隴澄清西域收復之時照常指撥於部章並無不合承撥各省當亦無詞況承平時應撥數目內又可節省百餘萬兩此後經理得宜節省或尙不止此實於 國家經出之費不無小補當亦部臣與疆圻諸臣所樂聞也臣於新疆擬辦各事皆以利民裕 國爲主行省之改與否尙未奏奉 明旨而所籌者無論改省與否兩不相妨可行

則行可止則止進退尙屬綽然過蒙 聖明矜諒示以轉圜之機若不披瀝直陳上紆 慈念更何以自
處至愚更有未盡者不得不及時陳明仰祈 垂察臣軍積欠之餉本八百餘萬兩頻年陸續清釐截至
光緒四年尙欠一百數十萬兩近因飭道員胡光墉息借商款遲遲未到劉典向蘭州票號借銀四萬兩
又飭後路糧臺道員王加敏息借漢商銀四十萬兩駐陝軍需局陝安道沈應奎息借票號銀二十萬兩
皆應急需合之關內外新欠餉項及遣撤勇餉又積至二百數十萬兩將來胡光墉解到息借巨款除還
陝鄂息借各款點綴新舊欠餉外所餘無幾縱極力劃留以備光緒五年應用之需豈及秋初又將告罄
前奉 諭旨嗣後無論何項急需不得動輒息借商款致貽後累敢不懷遵惟念甘肅新疆軍務臣既未
嘗劃款清餉而一切經費又未嘗另款請銷如果此次借用商款外各省協餉均能源源接濟臣猶可通
挪展轉以期兼顧更何敢動輒息借商款干瀆 宸聰無如各省疆臣身在事外但見西事速了此後需
用或可稍紓而頻年悉索以供未免因煩生厭頻催罔應本屬人情之常而臣則實逼處此莫展一籌將
有束手待斃之日可否仰懇 天恩飭下軍機大臣六部九卿公同集議將甘肅新疆從前每年預撥估
撥的餉四百數十萬兩指省解濟臣軍並於現協臣軍稍優各省酌撥解濟共足成五百萬兩之數以三
年爲期臣得於三年內盡心經理斟酌損益定爲永圖三年以後甘肅新疆軍務既肅所擬開源節流之

策亦必有成效可睹庶以前協款爲甘肅新疆用兵收復善後之需以後部撥爲甘肅新疆常例應有之款每年以三百數十萬兩爲度自無不可 上諭左宗棠奏撥陳新疆情形一摺據稱北路迪化等處自克復以來招徠開墾戶口日增南八城地方富庶現辦開渠丈地鑄錢徵釐諸事具有端緒開設行省於天時人事機有可乘等語新疆設行省事關創始必須熟籌於事前乃能收效於後日該大臣爲長治久安之計因時通變所奏不爲無見刻下伊犁未經收還一切建置事宜尙難遽定其餘南北各城應如何隨宜經理之處卽著悉心籌畫次第興辦總期先實後名俟諸事辦有眉目然後設官分職改設郡縣自可收一勞永逸之計所有辦理情形並著隨時詳悉具奏至所奏三年以內每年請指撥銀五百萬兩俾得斟酌損益定爲永圖等語著軍機大臣會同戶部議奏將此由五百里諭令知之○以上海果育堂絲業會館廣東華善堂浙江湖州仁濟善堂捐助賑銀頒給匾額○頒給直隸昌平州都龍王廟匾額○李鴻章奏遵查黃河北岸開州民埝漫口被淹情形報聞○乙卯以拿獲昌圖邊外逆匪予都司宛白貴等升敘有差○何璟等奏新設臺北府及所屬三縣各立專學請將文武學額分別改撥加增下部議奏○丙辰諭前因銘安奏片重複當諭令明白回奏茲據奏稱具奏時未將應行刪改之片撤出以致重複入奏實屬異常疎忽自請議處等語銘安著交部議處○諭禁賭博○總理各國事務衙門奏光緒三

年十月十三日與日斯巴尼亞國會訂中國民人前往古巴如何優待條約十六款請用 御寶並公立
憑單訂期互換得 旨依議行○諭廣安奏請嚴禁佐貳各員擅受民詞等語佐貳雜職營汛各員不准
擅受民詞例禁甚嚴若如所奏近來佐貳等衙門差役頗多武營汛地巧立弊端老將名目接受民詞私
設刑卡武斷案件貪贓不逞卽牒詳州縣顛倒是非魚肉小民各情殊堪痛恨著各直省督撫隨時訪查
嚴行禁止如有此等情弊著卽嚴參懲辦并姑容將此通諭知之○諭廣壽以壽慈奏遵查北運河上
游情形請分別疏築一摺據稱詳查潮白溫榆兩河泛溢淤塞情形擬請通州東北浮橋東西兩岸缺口
堅築堵塞以免潮白西溢溫榆之患另將沙窩村鈴鐘口兩處缺口修補於白馬河南岸起至西浮橋西
岸止斜築長堤一道以爲北關保障至溫榆故道之處宜裁灣取直挑挖舊河俾循故道新舊河相接之
處築擋水壩兩道其東岸通大橋處另築一堤使河流不致東溢並將下游自下關口起至小河口止及
白馬河下游淤淺處所均挑挖疏通使漫流仍由溫榆而下庶有裨益請飭籌款興修等語覽奏均悉著
照所請卽由直隸總督會同倉場侍郎自行籌款趕緊興修以衛民生而濟漕運○諭劉長佑奏籌辦臨
安土匪情形一摺卽著飭令在事員弁將未獲匪首上緊緝拏仍查明被害村寨暨就撫民人分別妥爲
撫卹其納樓土目營保極等並著購線務搜以期盡絕根株所有各府州縣及各營汛尤爲出力官紳暨

陣亡兵弁著准俟事竣後彙案奏請獎卹○以辦直隸賑務出力予周知朱采等升敘有差○以辦山西賑務出力予吳恩慶等升敘有差○丁巳諭巡視東城御史慶壽等奏請將緝兇不力之司坊官議處一摺本年九月間朝陽門外中街地方覺羅榮普住宅有白晝持刀入室傷斃人命竊去財物一案該司坊官車恩霖等月餘尚未弋獲賊賊實屬怠玩車恩霖張吉貞均著先行交部照例議處仍勒限嚴緝務獲倘限滿無獲卽行據實參辦○戊午諭明年三月二十六日 穆宗毅皇帝 孝哲毅皇后梓宮永遠奉安 山陵朕於三月二十一日恭奉 慈安端裕康慶昭和莊敬皇太后 慈禧端佑康頤昭豫莊誠皇太后啟鑾所有應行典禮並一切事宜著各該衙門及直隸總督敬謹豫備○予江西陣亡訓導段凌雲等祭葬世職○己未諭杜瑞聯奏前奏委解三起頭批京銅片內疊稱頭二兩起業經交清經戶部以情形不符奏請飭查茲查前片將頭二兩起按批交納字樣誤寫交清實屬率忽自請察議等語杜瑞聯著交部察議○以辦理京城平糶出力予朱其詔等升敘有差○瑞聯曾國荃奏管省捐辦牛馬糞於口外各盟長一體勸令捐輸以助賑務而資春耕允之○庚申諭明年三月二十六日 穆宗毅皇帝 孝哲毅皇后梓宮永遠奉安據欽天監奏謹擇於明年三月二十四日辰時由隆福寺行宮奉移至 惠陵隆恩殿等語前已降旨朕於明年三月二十一日恭奉 慈安端裕康慶昭和莊敬皇太后 慈禧端佑康

顯昭豫莊誠皇太后啟鑒敬於二十三日駐蹕隆福寺行宮恭詣 几筵前行奠酒行禮二十四日恭奉
穆宗毅皇帝 孝哲毅皇后梓宮至 惠陵隆恩殿二十五日祇謁 昭西陵 孝陵 孝東陵 景陵
裕陵 定陵禮成後敬詣 惠陵隆恩殿 几筵前行遷奠禮二十六日奉安禮成恭詣 神牌還京
升祔 太廟三月二十九日朕恭奉 慈安端裕康慶昭和莊敬皇太后 慈禧端佑康頤昭豫莊誠
皇太后還宮所有恭奉 梓宮由隆福寺行宮至 惠陵永遠奉安及 神牌還京均著毋庸另備御道
至應行典禮並一切事宜著各該衙門及直隸總督敬謹豫備○諭英奎等奏哈拉河等處游匪尙多盜
案疊出防兵太單難資鎮撫察哈爾換防兵丁餉項不濟請准仍由直隸宣化練軍內酌撥馬隊二百五
十名赴庫更換察哈爾防兵仍歸五百名之數等語著李鴻章如數酌撥派往○延煦奏奴才於前歲到
任之初檢閱移交案件有前都統瑞聯任內平泉建昌赤峰等州縣請拿賊首會稟內稱賊首王致岡糾
匪爲患起首於三邑接壤之哈拉道口始則三五成羣繼則勾結多倫綏綏匪孟洛四等多人明目張膽
四出劫掠屢拒官兵人心惶惑道路戒嚴且復此拿彼竄飄忽靡常稟請派兵緝拿在卷當於上年春間
密飭地方文武合力訪拿旋聞該匪由朝陽一帶竄而之東未能追獲惟時管帶練軍之守備松恩因公
來郡奴才面諭該員設法緝拿松恩回稱王致岡一犯兇狠詭詐迥非尋常現既遠颺惟有稍視懈弛

給之使來始能捕獲奴才聞其言似近理故自去秋至於今夏並未指名催捕而一載以來各處拿獲盜犯雖多獨王致岡一犯忽東忽西迄未就獲本年六月間松恩來郡稟稱訪得王致岡現在旋回在金麻溝轉山子等處勾匪圖亂當飭該員採訪確實會同建赤兩縣密商辦理去後嗣於八月十一日據赤峰縣知縣希凌阿稟稱平建連界之轉山子小河子沿一帶有匪徒七八十人於七月二十二等日糾黨備械結盟於于家店訪探確實請兵往捕前來旋據平泉州知州文銘稟獲賊匪張添得子得合一名訊供與王致岡等數十人在于家店結盟備械圖謀不軌屬實與希凌阿所稟大略相同正擬添兵往捕間於本月初五日接據松恩稟稱行抵赤峰與該管都司納岡該縣知縣希凌阿會議機宜各派兵勇分路兜拿並派把總楊慶改裝易服密往查探旋據探兵報稱王致岡在不泉境內崔家仗子盤踞其地左右山洞黨羽頗多掩捕不易惟該匪時至伊妹夫高瑞家每至二更始往五更即歸或可乘此得手松恩聞信即約會各處兵勇於九月二十二日馳抵該處乘夜步行至高瑞門外該匪知覺向外連放數鎗時有勇丁山秀奮勇闖入即被該匪一鎗正中前胸登時陣亡松恩見勢兇猛督兵直入鎗斃匪黨數名於月色之中瞥見王致岡拚死闖出閉鎗拒敵官兵恐正賊再逸合力追捕不顧其他把總楊慶等向前堵截王致岡跳下山坎被社首宋輝南練兵李文元用鎗桶打倒該匪被擒即用短刀自戕經李文元拔刀救

護幸未致斃賊高瑞乘亂潛逃其餘附近賊黨聞而四散搜出犯母犯妹各一口奪獲洋鎗花鎗馬匹等物馳稟前來伏查王致岡一犯凶暴素著狡獪異常擾害地方於今三載年來所獲盜賊供與該犯結黨者指不勝屈復結盟謀亂拒死乃丁實屬罪大惡極現飭赤峰縣就近審取確供盡法懲治所有在事出力文武各員竭盡心力冒險衝鋒為地方除一大害應山奴才查明歸併前案核實保獎以示鼓勵得旨准其歸併前案核實保獎毋許濫冒尋予松恩等升敘有差○永定河漫口合龍子史克寬等升敘有差○辛酉諭御史李鴻逵奏請飭整頓鄉試場規一摺鄉試為掄才大典條例綦嚴應試士子自宜遵守場規恪遵功令若如該御史所奏近年各直省鄉試士子任意亂號順天鄉試三場竟有士子拆毀號棚往來喧鬧等情實屬不成事體亟宜認真整頓嗣後順天暨各直省鄉試著派出之監臨及順天府府尹各該督撫申明簡章嚴行曉諭如有不遵約束者即行分別查辦若官役人等有藉端凌辱士子情事亦即按律治罪毋稍遷就○壬戌頒給潮州 關帝 天后廟匾額○以徐桐著吏部尚書○癸亥諭編修吳大澂著以道員用發往山西交會國莖差遣委用○諭前據都察院奏侍衛倭興額呈訴賊搶伊家財物糧犯釋放被誣栽賊並吉林匪徒肆擾等情當派崇綺馮譽驥前往查辦嗣因馮譽驥前往黑龍江查辦事件諭令崇綺查明擬奏茲據該侍郎奏稱查訊此案贓物不甚符合不能指現獲各犯為正盜至

齊廣員挾嫌裁賊一節該犯供詞閃爍提訊要證供後游移亦難憑傳鄉氏一面之詞徒事刑求遍認擬將傅與齊廣員監禁一年緝拿正賊務獲實明賊證再行分別辦理俟與額令回京當差等語該侍郎於此案既未查訊明確自應悉心推求期於水落石出乃遽以監候待質卽行奏結此案竟致懸宕不足以成信職辦理殊屬草率仍著該侍郎一面將現審犯證詳細推鞠一面嚴飭承緝各官迅將正賊拿獲查起真贓研訊明確按律定擬具奏俟與額著仍在吉林監候質訊不准先令回京另片奏吉林馬賊結夥擾害軍民之案實所常有經銘安督飭將弁隨時巡緝疊經拿獲正法現雖伏莽尙多並無大股竄踞韓効忠係金廠頭目銘安因捕賊需人准令投効賞給功牌及衣物等件韓効忠陽奉陰違仍於挖金處所勾引圖利經銘安訪知派員查拿遣散挖金人衆韓効忠先期外出未經拿獲程思敬訊無朦蔽情事惟屢次運貨赴金廠售賣雖無與韓効忠勾結爲匪確據究屬交通往來且平日干預地方公事人皆側目副將哈廣和竊送韓効忠賞項及稟領軍火等件均有銘安札批可憑並非私行接濟惟與韓効忠蹤跡較密以致噴有煩言等語程思敬著照所擬革去六品翎頂杖一百徒三年該犯尙有被控各案俟審明後如無另犯不法重情卽著照該侍郎所議辦理哈廣和著飭令仍回奉天聽候差遣並著崇綺督飭將弁將韓効忠嚴拿務獲訊明懲辦以警梗頑○江蘇學政林天齡卒予祭葬賞其子開榮舉人○彭玉麟

奏巡閱長江五省事竣行抵蘇州遵奏定章程到浙江退省庵休息報聞○甲子李鴻章奏主事區謬良
攜帶第四批幼童赴美國哈富地方居住照料各童學習文藝現在駐洋肄業局總辦酌量裁減駐美參
贊容增祥可兼任管帶學生區謬良遠涉重洋督率各生徒肄業已有成效請予優獎得 旨區謬良以
員外郎用○以錢寶廉署兵部左侍郎殷兆鏞兼署吏部左侍郎○王昕奏前因山西賑務喫緊 皇上
特簡大臣國敏銘與撫臣曾國荃會同辦理該大臣等公忠體國鉅細躬親其奏調各員亦皆不辭勞瘁
實心任事自在 聖明洞鑒之中惟該省州縣流品不齊巧於欺飾往往於上司耳目不到之處陽奉陰
違有名無實請為 皇上陳之山西素稱財賦之區風俗至為勤儉何以災荒偶值民不聊生緣該省自
同治八九年後連歲歉收置災不報雖以上年異常荒旱追呼徵比不減平時及至大吏奏請 恩施僅
科已將竣事尚有壓攤騰黃於額徵捐數後始行張貼以致 朝廷豁免錢糧之曠典徒飽官吏之私囊
其弊一至於捐賑之弊該省富戶好義急公一縣或捐數萬金或十數萬數十萬不等或願各保各鄉不
假官吏之手無如各州縣託詞解省勒限交官縱容書差上下其手有私賄者以富為貧有素嫌者以貧
為富稍拂其意從重苛派以致各處富戶爭向地方官求情納賄避重就輕羅掘之資率歸中飽其弊二
至於放賑之弊各屬倉穀本不足額今日巧借名目或捏報煮賑藉以銷賄或託詞平糶盜賣入己及至

承領濟米以濟賑需助未成災無賑災未經勘無賑災戶中或有薄產或習白工或在壯年無賑其有賑者查戶口有幾領賑票有費不過耐郭居民衝途烟戶尙有升合之惠其僻遠處所貧民扶老挈幼竟有奔馳數十里守候三五日空手而返者且有僵死於路者官吏侵吞剋扣以致實惠不能及民其弊三以上諸弊該省人言嘖嘖不爲無因溯自上年迭次奉 旨撥解濟米數十萬石庫銀數十萬兩加以本省賑捐天津賑捐接册而摺爲數甚鉅何以如此籌措民困未紓現聞不請解絀各局戶口不及去年之半非轉於溝壑則逃之四方耳民生如此賑務可知吏治更可知已似此不肖州縣業經漁利於前若再優保於後何以昭公道而服人心合無請 旨飭下閩徽銘分飭李用清羅嘉福等親歷災區檢閱民間完納糧票核對有司徵收官簿是否相符並查各州縣上年原有倉穀若干本地捐項若干外省撥解銀米若干以及放賑次數食賑名口認真稽查飭局申報如有虛冒卽予嚴參庶劣員不至濫膺優獎而出力者益昭激勵又奏 旨前閩邸抄知山西溺女之風業經前撫臣劉秉璋設堂收養矣 臣於同治八九年間視學山西諭知該省溺女相沿成習曾經出示禁止現經災荒之後且恐此風尤甚緣該省遠京者多富商大賈之家率皆男不知耕女不知織其不爲商賈者則亦但有農事而無女工婦女不習操作嫁娶又貴厚奩所以該省貧民養女視爲賠累往往生而不舉怨氣所結厲氣乘之故論者謂山西災祲之重一

由蠶粟之有妨民食一由溺女之有傷天和今欲求所以生之必先籌所以養之臣近見陝甘督臣左宗棠奏請嚴禁蠶粟卽令植棉所陳利害最爲明晰山西與陝西接壤地氣寒煖無殊該省現當嚴禁蠶粟之時正可仿照辦理相應請 旨飭下山西撫臣曾國荃飭屬查勘除夏田勸農植穀外山田瘠瘠之地可以樹桑其平衍處所亦可種棉果能家喻戶曉相率操作男耕女織無不可資以養身既無凍餒之憂自有室家之樂不但蠶粟之害從此永除並溺女之風亦不禁自絕 上諭給事中王昶奏山西地方官辦理賑務不免欺飾請飭認真查核一摺據稱山西上年異常荒旱地方官仍前徵比錢糧及至奏明蠲緩催科已將竣事并有壓攤賠墊於額徵扣數後始行張貼者該省官戶捐款各州縣託詞解省勒限交官甚至縱容苛差苛派中飽至收賑之弊官吏侵吞剋扣實惠不能遍及等語山西飢饉薦臻朝廷軫念災黎時厯宵旰迭經降旨撥發銀米諭令該省大吏妥爲撫綏各州縣應如何盡心籌辦若如該給事中奏尙復成何事體著閣部欽此曾國荃卽令派出之查賑各員紳將該給事中所奏各情形一併認真稽查如有虛冒情弊卽行據實嚴參前准李鴻章等所請承辦山西賑務人員分別保獎其辦理不能得力各員仍遵前旨毋許濫行列保另片奏山西禁種蠶粟請飭勸植桑棉等語蠶粟有妨民食現經該省遵旨嚴行禁止著該撫飭令所屬除夏田勸農植穀外并應相度土宜如可以樹桑種棉之處隨時勸課種

植俾利民生至溺女之風前已有旨申禁據該省溺女相沿成習恐被災之後此風尤甚著該撫飭屬
嚴行查禁以挽澆風○乙丑前戶部尙書魁齡卒賜祭葬賞其子福緒主事○諭錫綸奏逆回竄擾塔境
派兵追剿情形請將出力各員獎勵一摺本年八月間塔爾巴哈台西南一帶突有逆回竄入經錫綸派
令佐領三音布音等帶兵追剿傷賊多名匪黨即逃遁塔境現已安堵所有在事出力之佐領三音布音
著賞戴花翎六品軍功吉林太著賞換五品頂戴並賞戴藍翎台吉瑪木爾伯克著賞給四品頂戴花翎
以示鼓勵○諭步軍統領衙門奏要差需款甚急請飭迅撥銀兩一摺兩淮欠解該衙門帑利銀兩爲數
甚鉅現因辦理明年隨扈差使需用孔急著兩江總督嚴催兩淮鹽運使先行籌解銀四萬兩倘該運司
暫難措撥卽著該督在藩庫內無論何款先提銀四萬兩迅速起解務於明年正月內解到仍責令該運
司如數解還藩庫以清款項○以收發豫省災民賑濟出力予知府續慶等優敘○丙寅命成林宜振查
勘東西陵工程○諭楊重雅奏續獲贖匪滋事案內首要各犯請將已革副將開復原官一摺據西懷
遠縣地方本年七月間齎匪滋事首犯伍開先聞拿在逃經楊重雅派令已革副將楊子吉帶兵擒獲並
經知縣向先溶等將傳教惑衆之梁振綱及聽糾滋事各犯先後緝獲訊明分別懲辦逸犯單雲揚等仍
著飭令嚴緝務獲究辦毋任漏網已革副將楊子吉於被參後卽將匪首嚴法擒捕尙知愧奮著准其開

復原官餘著照所議辦理○段福昌奏近年南北各省水旱頻仍 朝廷宵旰焦勞勤求治理而感召尙稽者獄訟之不平無以弭冤抑而迓和甘也獄者生人大命臬司總匯刑名凡詞訟到司皆宜親審況京控案情重大尤當悉心研求伏讀同治元年 上諭嗣後凡京控交審之案各該省督撫務當嚴飭臬司親提審訊不得仍歸府局任意延宕等因欽此 聖訓煌煌自宜恪遵辦理乃日久怠生臬司並不親提仍委府局則迴護賄徇之弊自所不免近來結案或云懷疑誤控或云事出有因顛倒了事幾於千手雷同雖其中不無健訟之輩而民情之畏法者多非實有沉冤誰肯自投縲纆查道光四年山西榆次縣之案近年浙江餘杭縣之案皆一提京臬立至平反外省臬司未聞平反一案者寄耳目於他人安得不受其贓蔽也於奉 旨親提之案並不親提既已顯違 諭旨於民間冤抑不爲伸理或致尋仇靡已亦更貽害閭閻重案且不親審則尋常詞訟可知臬司幾無應辦之事既非所以勸職守京控之案必皆曾經府審令交原問是錮之於不得平反之地而欲以杜京控之來尤非所以清訟源臬司任重職崇豈皆玩視民瘼無如積習已久驟難挽回夫弊既積久而難除則法亦因時而必變董仲舒所謂爲政而不行甚者必變而更化之乃可理也相應請 旨飭部將京控案件專責臬司親審不得再委府局並責成督撫稽查一併嚴議章程編入則例以昭信守而懲玩泄則庶幾纖獄得平可期無訟矣 上諭段福昌奏請

將京控案件專責臬司親審不得再委府局並嚴定章程一摺著刑部議奏○諭穆圖善奏軍臺廢員由配脫逃請緝究辦一摺廢員成福興福勝顏榮陸應啟由配脫逃難保不潛行來京著步軍統領衙門順天府五城御史一體嚴緝務獲究辦○諭工部奏請行催解樓毛一摺工部恭備壇廟常朝樓甍以及各應各取樓毯並明年三月 穆宗毅皇帝 孝哲毅皇后梓宮永遠泰安 山陵需用樓毯為數甚多兩江欠解樓毛十五萬斤久未解到著該督嚴飭委員迅速起解限於明年正月內一律解交應用另片奏請催解飛金等語該部恭辦改飾 太廟 神龜案椅等項需用飛金江蘇欠解紅金三千二百塊迭經該部嚴催仍未解齊殊屬延緩著該督撫嚴飭承辦之員即將欠解金塊勒限星速解部此次所需樓毛金塊典禮攸關極為緊要不得稍涉遲延致有貽誤○丁卯以倡辦賑捐出力予總兵程文炳等升敘有差○戊辰命榮公守護 東陵○以督運賑糧出力賞叙駿二品頂戴○己巳諭為治之道首在講求吏治又安民生而武備修明尤為經國要務封疆大吏受朝廷特簡之恩畀以重寄宜如何整躬率屬共濟時艱以副委任近聞各直省督撫實事求是者固不乏人而因循怠玩過飾非者亦正不少且有偏袒同鄉及覆庇年世交誼情事用舍不公而欲屬僚畏服吏竊民懷其可得耶又出帶兵將弁往往虛報名糧冒銷軍火私肥餽索日用豪奢此弊不除其何以使將士一心緩急可恃著通諭各該督撫等

痛自循省有則改之無則加勉凡地方利弊民生休戚總當虛心諮訪因時制宜用人則一秉大公毋稍偏徇局員中之賢聲卓著名實相符者固應保薦其貪庸廢弛者亦應立予參劾不得瞻顧情面曲事姑容庶幾大法小廉吏治日有起色至各營弁查有前次情弊即著從嚴參辦以肅軍律而飭戎行經此次訓誡後倘敢不知振作積習相沿一經朝廷訪聞或被參得實必當執法嚴懲決不寬貸正朝廷以正百官出治之原尤宜嚴肅前已迭降諭旨責成軍機大臣實心匡弼勿避嫌怨並令各部院大臣勤求治理力戒因循仍著懷遵前旨同心任事宏濟艱難不得日久懈生又蹈玩愒故習○辛未慶春何璟奏福建省設立閩海關監督始於康熙二十三年其時僅將南臺廈門兩處口岸報部雍正七年始將南臺等二十處口岸報部其初或由巡撫兼管或由監督專管本無一定乾隆元年歸福建總督管理三年總督兼轄閩浙始以關務改歸將軍七年由督撫臣題徵稅口岸共十九處歷今百有餘年未嘗輕議更改權稅亦從無貽誤耳以列聖於此幾經詳慎比較而後垂為定制率由罔愆此成憲之不可改者也閩關正額盈餘每年應徵銀十八萬五千兩同治四五年間歲只徵銀七八萬餘兩迨前任將軍英桂文煜歷加整頓逐漸旺徵遞年以來已徵至十四五萬兩近年三聯票暢行光緒二三年迭遭水患常稅稍形減色然常稅雖減洋稅日增現在全年四結福廈廈口徵銀二百四五十萬兩滬尼打狗狗口約徵銀三

四十萬兩擬之江海關則不足較之江漢粵海等關則過之此盈彼絀理勢固然不獨閩海一關爲然也其通關支銷一切經費除稅務司辛俸各款外每年僅支銀一萬三四千兩實較他關尤爲撙節法不敝不變今閩關法尙未敝似不宜變此公事之不可改者也閩海與粵海情形不同粵則海口錯綜西如高廉雷瓊海口東如惠潮各口皆由書吏承攬監督轄千餘里之稅口委用數十書吏稽查稍有不密或不免滋生弊端而閩則口岸無多每總口向派協佐領等一員專司稽察胥役尙不敢多方朦蔽挾持以逞其私今若改歸督臣兼理督臣任兼兩省案牘紛煩近復加以臺防緊要既不能躬親瑣務仍須掄委平時可信之員前往勾稽與派協佐領等官亦復何異若派大員分駐總口誠恐收數未增而耗費轉鉅倘章程不能畫一稽查偶有未周或初年竭澤而漁而來歲難乎爲繼或一時損下益上而久則百弊叢生嘉事紛更効略未覩更滋紛擾抑又何裨此大局之不可改者也同治四年今大學士左宗棠在閩浙總督任內視師粵東粵海關稅請由督撫設關籌報旋經廣東督撫臣陳奏請仍照舊辦理奉 旨允准在案今閩海關事同一律臣等悉心會議竊以爲改章循舊其要總在得人然改章則上智或難循舊則中材可守倘能剔除弊竇招徠客商官吏皆潔己奉公權務自日有起色就目前閩關情形而論似以認真經理不宜改弦更張至於虛心求言正己率屬是 臣慶春昕夕孜孜不敢稍懈者 臣環同城咫尺遇事亦

與籌商斷不敢以任非己肩遂忘規益如有吏胥丁役侵蝕欺朦收多報少一經查確亦當據實奏聞按律懲辦以期仰副 聖主慎重關徵之至意報聞○辛未諭緝溺舉人英桂一體重赴鹿鳴筵宴著禮部擬入則例著爲令○癸酉雪○諭御史田翰堉奏棍徒指官嚇詐請飭嚴禁等語近來京師地面棍徒往往藉充兵役傳案索詐難保無句串書吏假捏官票情弊著步軍統領衙門順天府五城御史嗣後遇有傳訊之案按票蓋印並摘錄案由及原告姓名以防假冒如查有兵役藉端嚇詐情弊卽著送交刑部從重治罪毋稍寬縱○諭兵部奏請飭催積欠租銀一摺直隸各州縣應解兵部馬館地租生息銀兩積欠甚多明年 穆宗毅皇帝 孝哲毅皇后梓宮永遠奉安該部應付車馬煩多需款孔亟著直隸總督飭令藩司無論何款卽行設法於歷年欠銀七萬餘兩內先撥銀二萬兩並將欠解本年租銀二千八百餘兩如數措齊限於年內撥解到部毋得遲延嗣後務須年款年清不得再有拖欠○御史田翰堉奏 恭讀本月十五日 上諭所有恭奉 穆宗毅皇帝 孝哲毅皇后梓宮由隆福寺行宮至 惠陵永遠奉安及 神牌遷京著毋庸另備御道欽此在 朝廷軫念時艱於舉行 大典之中仍寓撙節民力之意直省災黎莫不同深感戴矣無如向來辦差州縣往往藉端苛派胥吏從而需索多方賒借擾害閭閻在中年照章供億民力已屬拮据當此災歉頻仍雖薄有收成而瘡痍未釋若復誅求無藝小民更不聊生

臣聞近來河間冀州一帶瘟疫間作頃刻傷人天災流行至今未艾可否 飭下直隸督臣李鴻章嚴飭所屬所有此次 聖駕出京恭修 御道務須按照災歉輕重分別酌派不准苛斂浮收如查有侵吞情事州縣則立予嚴參胥吏亦從重治罪庶災黎得延殘喘而元氣可以漸復 上諭御史田翰鼎奏明年恭修御道請飭嚴禁苛派需索一摺前經降旨明年恭奉 穆宗毅皇帝 孝哲毅皇后梓宮山隆福寺行宮至 惠陵永遠奉安及 神牌還京均著毋庸另備御道原以體恤民艱茲據該御史奏稱向來辦差往往有州縣苛派胥吏需索等弊尙復成何事體現在災歉頻仍民生困苦尤應嚴行申禁所有明年恭修御道著直隸總督嚴飭所屬按照災歉輕重分別酌派不准苛斂浮收如查有州縣及胥吏侵吞情事卽著嚴參懲辦毋稍寬縱○諭李鴻章奏已故三品封職鄭百樸孝友兼全急公好善請卹飭部旌表等語孝行例應旌表向由本省督撫分別具題該督所奏著毋庸議

東華續錄

光緒二十六

臣朱壽朋敬編

臣章圭璋恭校

十二月丙子朔諭前據文格奏山東署陵縣知縣趙多熙貪獲抗擄搶掠匪黨馬希固等二十餘名就地正法辦理草率請予議處當恐該員稟報情形未盡確實令文格再行查明具奏茲據奏稱查明馬希固等實係附從趙多熙聚眾抗擄搶掠經趙多熙捕拿到案傳聞趙多熙來城奪犯遂將甘心入夥匪黨馬希固等就地正法原非枉殺無辜惟因其於飭查後始將犯供錄送是以請予議處等語此案既據文格查明馬希固等犯聚眾抗官罪有應得趙多熙將該犯立時掩捕地方始就安謐迫聞趙多熙犯之謠即將該犯等就地正法係為倉卒弭患起見辦理尙無不合趙多熙著加恩免其議處嗣後地方官尋常拿獲匪徒仍當具稟錄供詳由督撫核辦不得稍涉專擅以昭鄭重○丁丑以軍機處繕修漢字檔冊校勘出力予李芳柳等升敘○戊寅撥直隸藩庫銀三萬兩恭辦 惠陵永遠奉安事宜○命岐元興恩興修 大政殿工程○庚辰 上詣 奉先殿 壽皇殿行禮○辛巳命恩承祁世長承修 泰陵正紅門及正紅門外 神道石牌樓並禮部果樓工程○杜瑞聯奏查滇省自遭兵燹不惟學中群籍蕩然無存卽民間

藏書之家轉徙頻年均多燬失肅清之後坊肆雖偶有刊本大都刪節不全難資考鏡臣前服官湘南稔知鄂省設局最久刊書較多其地水陸交衝四通八達故各省寄存善本卷帙尤爲浩煩當經會商督臣率同司道悉心參酌謹將 欽定經史 御選詩文以及有益身心有關經濟等書先開數十種檄飭湖北催餉委員就近購覓去後茲據該委員按單購就交給便員帶解到濟臣復將隨帶書籍酌捐數十種當即公同檢閱分發兩書院存儲藉資講習並擬擇其尤要者飭司酌籌經費陸續校刊分發各學仍遵舊例廳坊間印售以廣流傳務使邇邇士風蒸蒸日上報聞○以捐廉助賑予譚宗浚優敘○壬午諭御史孔憲穀奏樊口建閘築堤有關農田水利請簡派大員復勘一摺據稱湖北樊口築堤一事彭玉麟與李瀚章所奏意見不同請飭彭玉麟將李瀚章原奏逐條查覆或飭楊岳斌就近查勘等語此案李瀚章於彭玉麟查覆明降諭旨後續據具奏該處情形當即諭令該督等督飭屬員妥議辦理並令將建閘以後利病若何隨時體察情形據實具奏如果創建石閘有利無弊而李瀚章固執成見不爲辦理朝廷亦不能爲之曲恕現在該督方奏明飭議舉行該御史復請派員復勘所奏殊非政體應毋庸議李瀚章等惟當懷遵前旨於該省農田水利通盤籌計務策萬全不得稍涉偏執亦不准故爲遷就以致貽誤地方前派恩承章華前往四川查辦事件孔憲穀何以指爲樊口決堤之事率以臆見形諸奏牘殊屬冒

味另片奏武昌府知府方大澐居心巧猾專事逢迎李瀚章辦理樊口一案均由該府引導請飭查辦等語方大澐歷任官聲若何其與樊口之案有無迎合妄爲之處著潘霽確切查明據實具奏毋稍瞻徇○癸未會同李奏山西忻州因年歲歉收市糧稀少居民買食維艱先將常平倉存穀陸續平糶俟來歲秋收豐稔卽行買退得旨如所請行○會同李奏督省撤練歸伍報聞○諭前因廣東省同治二年請加文鄉試定額一名與咸豐年間會試章程不符經禮部奏准改爲廣一次中額三名同治甲子至光緒丙子大科除扣抵外尙多三名應分三次扣還茲據奉天府府丞王家璧奏同治二年所加廣東文鄉試定額一名請毋庸裁撤扣還等語同治年間廣東省所加文鄉試定額既與定章不符自應仍照部議更正其歷科取中尙多三名加恩免其分次扣還以示嘉惠士林至意○以桂清畢道遠等辦理本年全漕出力交部議敘○甲申諭順大昌平州民婦李劉氏呈控民人蕭山林等勾串公爾瑞興車夫劉十等掘墳棄骨等情一案前經刑部奏明交李鴻章委員前往查勘訊明定擬茲據該督奏稱兩造呈出地契皆非所爭墳地之契查係山坡無主荒地李玉家原葬墳墓移葬他處因前經瑞興呈控該知州勒令遷出並非蕭山林等私掘亦無拋棄屍骨情事須訊取兩造切實供詞方可定讞酌飭順天府就近提訊等語此案著交萬壽菊周家楣親提人證詳核案據秉公研訊確情按律定擬○予陵運賑糧病故提督王孝理

祭葬優卹○乙酉諭前因給事中王昕奏山西辦理賑糧中途委積官吏扣需索放賑差欠不齊等情當經諭令李鴻章等確切查明嚴行參辦茲據該督等奏稱山西轉運賑糧係於直隸河南設局分途挽運山西復設分局遴選員紳坐局承辦並中途兩淋日曝不敢謂絕無需變迨運到各局實無需積腐敗各情所發腳價均按民價發給從無控告委員克扣役需索之案各局隨到隨發散放有先後之別並無始終不放情事業已確切查明據實覆奏等語本年山西省被災甚重朝廷發帑截漕俾資賑濟該省官吏自當仰體軫恤災黎之意認真籌辦既據查明賑糧並無委積轉運各員亦無克扣腳價情弊應毋庸議現在趕運東漕十二萬石所有在事各員惟當始終勤奮俾賑糧早到一日災民卽早沾一日之惠仍著李鴻章閱撤銘曾國荃隨時嚴密訪查並諭令承辦各員實力奉行悉心經理毋任吏胥藉端舞弊○以捐助賑銀賞山東鹽運使傅觀海二品頂戴○丙戌諭閱撤銘曾國荃奏請將荒謬妄為之知縣革職查辦一摺山西當此大祲之後地方官應如何體念民艱加意撫恤乃稷山縣知縣王懋庚到任數月卽行私派捐輸修理衙署實屬荒謬已極且於應徵麥種銀兩並不照章散給專散無主絕亡荒地責令村人承種幾令有主之業反無麥種可領亦屬辦理不善又遇有案件輒敢勒令兩造出資事多曖昧尤應澈底根究王懋庚著先行革職撤省查辦○諭理藩院奏查明達爾罕親王被參各款請旨懲處一摺

此案科爾沁扎薩克達爾罕親王棍布旺濟勒雖無不諳公事嚴暴妄為等情所罰牲畜皆係屬下情願備給並非勒派其畋日行圍亦未傷人惟身為扎薩克統轄一旗乃向屬下借用銀至三千餘兩之多即非有意苛派實屬分所不應著交理藩院議處所借銀兩著該盟長嚴催該王迅速照數償還副盟長卓理克圖親王濟克登旺庫爾於查辦各款前後所報兩歧亦屬咎有應得著一併交理藩院分別議處扎蘭立克丹輕信烏德勒叩之言率行傳取牲畜革去扎蘭交該旗嚴加管束○以捐助賑銀予道員吳仲翔優敘○譚鍾麟奏查陝省去歲荒旱成災經臣飭屬開倉賑濟勸款買糧勸諭紳民捐撥並行歷將辦理情形先行奏報在案計自去秋九月初一日起至今年六月底停賑止統計各屬賑過糧次貧民男女大小三百一十四萬口有奇共用銀二百三十餘萬兩用糧一百十餘萬石其中官項捐款約略各半所有省內外分設各局採買糧價平糶虧本水陸分途轉運節節安站經費夫驛車船運費護運兵丁口糧收養遺棄幼孩醫治貧民疾病捐備棺木收買耕牛散放棉衣資遣鄰省飢民置備各項器具局用員役紳士民夫薪工一切因公費用款目甚繁均無藹章可循當舉辦之初祇期實惠早沾因時因地設法拯救何嘗計及合例與否現在賑務告竣即應趕造報銷惟查災區太廣歷時太久人數則愈賑愈多即此三百十餘萬飢黎僅恃此一百十數萬石糧何足以延殘喘所幸陝民遵照勸諭稍能自給者咸自願

其族戚鄰里或立約借貸銀錢或以房地典做糧不足則以官糧濟之細核各屬舉賑之期則有八九十冬等月先後之不同散賑之地則有煮粥放糧平糶給錢辦法之各別勻撥之數則有每口給予八升七升六升多寡之不一極量之用則有京斗倉斗市斗輕重之各殊及今春苦旱夏糧無收則又不得不推廣 皇仁加展賑期給以籽種溝中之瘠幸免例外之用實多若責令各屬照例造報勢必牽合例章虛列款目所銷非所用殊非實事求是之道臣悉心酌核與其遷就附會名爲核實究屬欺朦曷若直陳於君父之前用昭無隱 恩將賑款數目開單奏報免造細冊允之○丁亥諭惇親王奕劻等奏承襲公爵查核詰命與吏部查覆不符請旨遵查一摺文謙所出之入八分鎮國公一缺應以入八分輔國公降襲再出缺時以不入八分公世襲罔替至詰命內清文漢文因何歧異之處著該部查明覆奏○戊子張佩綸奏近年 諭旨深以大吏偏袒同鄉護庇年世誼爲戒同鄉年世誼且不可況大臣之子弟哉夫大臣子弟卽敘資進身往往較白屋而易數十年來內而部院優差外而軍功葉保大抵闖入者多矣然未嘗有以人才特薦者有之自大學士寶鋆之弟寶森始臣直隸人聞寶森令直隸時庸瑣無才能以門第見容而已曾國藩來督直隸寶森仕宦不遂乃以道員改四川數年之間催釐以給人以此服寶鋆之不私丁寶楨懇請送部引 見其厭之使去聞耶其借之以自給於政府耶皆未可知要之保薦特庸瑣

無實績也夫子爲九卿父雖名宦不得請祀兄居政府弟顧可以虛譽邀 恩乎幸賴 聖明予以原班
仍發原省俾督臣之術無所施於 君父之前此亦足以坊迎合用事者矣然而風氣日靡羣用慕效不
圖刑部日久奉行之故事亦無端而破壞之也查刑部 京察向以律例館提調四人秋審處坐辦四人
列入一等提調坐辦中有主事則取各司掌稿之正途郎中員外郎其數行之二百餘年矣實郎不能得
提調坐辦其主司稿而才者自有截取用繁缺之例意至周也從未有不提調不坐辦不正途而得一等
者有之自左都御史翁同龢之兄子翁曾桂始臣維張廷玉輔政時劉統勳疏請裁抑相臣親族得 旨
宣示以 高宗純皇帝之聖張廷玉之賢劉統勳與之同心立朝何至斷斷不少假借蓋杜漸防微爲
國家保其法亦爲張廷玉保其令名也且寶鋆翁同龢誠非賢者則已誠賢則奈何使天下之奔競夤緣
者援其子弟之已事以爲口實哉臣愚擬請將寶鋆之才具如何 垂問寶鋆代決其出處使疆吏知政
府有人也其翁曾桂列入一等之處明知 記名與否斷自 宸衷然不如 飭部更正以全翁同龢之
家聲庶 朝廷得處大臣之道大臣得處子弟之道足以式百僚足以示天下 上諭張佩綸奏大臣子
弟不宜破格保薦一摺據稱四川候補道寶鋆係大學士寶鋆之弟特庸保薦恐以虛譽邀恩刑部郎中
翁曾桂係都察院左都御史翁同龢之兄子並非正途出身不由提調坐辦而京察列入一等恐爲奔競

黃緣口實等語所陳絕無瞻顧尙屬敢言丁寶楨特薦寶森有何項實績著該督據實具奏毋稍迴護所
稱寶森前官直隸並無才能一節並著李鴻章查明寶森在直隸時官聲政績究竟如何詳細具奏刑部
郎中翁曾桂平日差使若何此次京察因何列入一等著該部堂官據實復奏至司員不由正途出身京
察保送一等是否合例并著吏部查明具奏○予江蘇吳縣孝子鄭言樞旌表○以陝西延榆綏鄜四府
州被災較重命暫緩考試○己丑以孫貽經爲工部左侍郎張蔭卿署吏部右侍郎潘祖蔭署工部左侍
郎○庚寅諭軍機大臣等前據左宗棠奏籌辦新疆事宜三年以內請飭每年指撥銀五百萬兩當諭令
軍機大臣會同戶部議奏茲據奏稱新疆經理善後各事宜需款甚急請飭各省將協濟西征月餉每年
共銀七百餘萬兩儘數報解等語新疆各城市經裁定所有辦理善後一切事宜需款孔殷應籌畫接
濟俾該大臣得以次第經營爲一勞永逸之計茲據軍機大臣等所奏鉅款難以另籌而要需必不可緩
係屬實在情形卽著照所議各該省應協左宗棠月餉光緒五年起三年內均按十成數目報解俾資應
用其應扣借欸恩銀省分准其歸併計算該將軍督撫務當共體時艱力籌解濟毋得稍有延欠解解不
足數卽將該藩司監督照貽誤京餉例指名嚴參果能如數迅速撥解並著照報解京餉全完例奏請議
敘以示懲勸至新疆招徠開墾及鑄錢徵賦等事宜亟須認真興辦並籌勇如何裁併改行餉爲坐餉以

期開源節流左宗棠務當相度機宜悉心經畫用裨大局明春金順金運昌各營能否酌量遣散撥入伍力求撙節之處著該大臣會商金順等妥為籌辦其三年以後新疆善後諸事就緒如何酌定餉數作為永遠經費之處屆時著戶部奏明辦理另片奏督豫兩省協餉請隨時酌量籌辦等語山西河南兩省應協西征月餉前因旱災暫緩起解自明年為始自應仍照原撥數目竭力籌解第恐災難之餘款項不無支絀如實在不能解足屆時著該撫據實陳明由戶部另行酌量籌撥將此由五百里諭知左宗棠慶春沈葆楨何璟李瀚章劉坤一丁寶楨吳元炳裕祿李文敏梅啟照文格曾國荃涂宗瀛潘鼎新邵亨豫張兆棟並傳諭李明墀知之○諭前據都察院奏已革知縣邢世銘以被沈葆楨奏參冤抑等詞呈訴當經諭令裕祿查明具奏茲據奏稱查明該革員雖無貪婪情事惟前在定遠縣任內辦理匪徒措置未能合宜平日不能約束書差至催收錢糧傳訊案件藉端擾累又容留因案遞籍改換姓名之家丁尤屬有心欺飾參以革職未為冤抑等語邢世銘既據該撫查明並無冤抑業經革職著毋庸議○辛卯諭前因軍務未平用款不繼不得已開捐納職藉濟餉需乃近來中外捐納各員其為守兼優才具可用者固不乏人而濫竽充數甚至有玷官箴者實屬不少至各局辦理捐輸原不無實事求是有裨國計之處而行之日久捐資之影射捐生之取巧又委員等種種弊竇不一而足於澄治吏治之道既多窒礙於餉需亦

多有名無實自應及時停止以肅政體著戶部及各省督撫通盤籌畫務將京捐局及各省捐局每年入項若干詳細查明將此項作何支用之處設法籌款相抵一面奏明停止捐輸毋得藉詞款項難籌有意延宕○鹽紳托克湍奏查所屬呼蘭巴彥蘇蘇北團林子三處地方各相隔二百餘里之遙東南毗連吉林之三姓阿勒楚喀等城西北距省一千餘里該處地面幅員遼闊佃戶日漸稠密良莠不齊除暴安良誠非易呼蘭城守尉衙門額設兵四百八十餘名除派巡防截剿住卡催科捕盜一切差使外又兼稽字等界歸公地畝均須接段派員分查官兵實不敷用曾於同治八年間經將軍德英奏准中壘爾根等城分別移添巴彥蘇蘇武營職官九員委為協領佐騎等缺安設甲兵二百餘名副甲一百名稽查盜匪兼衛地方嗣因該處境地遼闊遇事則鞭長莫及請將此項官兵內分駐北團林子一半以資巡防仍歸委協領管轄近因招墾佃民日增五方雜處地廣兵單訪察難周加以吉省之三姓阿勒楚喀等處山深林密盜賊出沒靡常該處距省千有餘里每遇告急兵到則賊匪早已遠颺即或追剿亦難盡數殲除似此勞師糜餉何所底止卽上年巴彥蘇蘇屬營及北團林子營汛突被竄匪焚擾實緣兵力單弱缺少大員統率之故奴才等於上年秋間奏派墨爾根城副都統恩合帶兵前往巴彥蘇蘇一帶防剿兼施駐守年餘地方雖覺安靜但誠恐官兵一撤竄匪復來乘隙為患其害尤非淺鮮若令官兵常川駐守不惟日久

疲乏卽每年所需口食馬乾等項約須動用租錢六萬餘帛勞師糜餉終非久遠之計奴才等身任邊疆稔知地方情形若不因時調劑變通力求長治久安之策有負 聖恩委任至意奴才等督率八旗協領等官熟籌再四當此整頓營伍豫備邊防之際呼蘭兵雖較少而各城營伍均關緊要斷不敢稍行移撥自應因時制宜量爲變通以資鎮攝但近來餉項久缺曷敢不體察時艱力求撙節第以出防官兵與其經年在呼蘭巴彥蘇蘇駐守支領口食馬乾曷若量款於該處添設官兵將防兵撤隊歸伍不惟就近防剿得宜而緩急亦覺可恃如此變通辦理則撤防之官兵口食馬乾請歸於新添之官兵支領核其數目所增無幾庶餉不致虛糜而防剿可得實用惟既請添設官兵而呼蘭城守尉職銜似覺太微遇事不足彈壓奴才等不揣冒昧據情瀝陳擬將呼蘭城守尉員缺請改爲副都統一員該處原有副管二員改作正任協領加添佐領四員騎騎校四員筆帖式三員領催十大名前鋒二十四名甲兵一百六十名內添設委筆帖式六員委官七員均由此項領催前鋒甲兵內挑選不開底缺仍食原餉合併得有額兵四百八十餘名共爲六百八十餘名分旗撥添勦加演練以壯軍威設遇緊急足資遣用查巴彥蘇蘇北團林子兩營均係適中之地稽查捕盜更屬緊要亦應酌核添設官兵保衛地面擬請將巴彥蘇蘇營現有官兵全行移駐北團林子合併該營原有官兵共爲二百七十七員名歸委協領管束在北路梭巡捕盜惟

巴彥蘇蘇武營請添協領一員佐領四員騎校四員筆帖式二員領催十六名甲兵一百八十四名內添設委筆帖式四員委官四員均不開底缺仍食原餉並將舊有副甲一百名均請改為正兵共合爲三百一十一名歸協領管束在南路稽查捕盜該南北兩營暨同知廳員均請就近統歸呼蘭副都統衙門節制以期總攝免誤事機如此變通撤防添兵實於地方公務大有裨益下部知之○賞普濟堂資善堂等處粥廠米石○頒給甘肅慶陽府文殊廟匾額○壬辰飭直隸解銀四萬兩歸鑾儀衛恭備梓宮奉安及神牌還京要差○癸丑諭吏部奏遵查捐納人員京察保送一等會於嘉慶年間欽奉諭旨載在例文惟應分別年資統計歷俸試俸并無不准保送之條刑部奏郎中翁曾桂在部行走十餘年才具優長實堪一等向無不出提調坐辦不列一等之例各一摺飭曾桂既據該部奏稱列入一等并無不合張佩綸所奏著毋庸議○甲午諭御史樓曾奏扣查漕糧御史營私舞弊請旨飭查一摺據稱本年漕糧米數多有偷漏該御史吳震得職縱容請飭查辦等語漕務關係極重若如該御史所奏殊屬荒謬糊塗著倉場侍郎秉公確查據實奏明毋稍徇隱另片奏此次漕務完竣請獎巡糧員弁人數較多係英霞主稿亦有賄求朦獎情弊著一併查奏所請嗣後每年漕務完竣應否酌獎數人示以限制之處著戶部倉場侍郎妥議章程具奏○諭文彬奏籌復河運請飭江安糧道移紮江北等語糧道移紮江北於漕

運事務諒尙相宜惟有無窒礙之處必須詳加釐度卽著沈葆楨悉心酌議據實具奏○丙申命錢寶廉承修 蘇陵 隆恩殿及 泰陵正紅門工程○左宗棠奏督辦甘肅新疆善後事宜楊昌濬到甘日期報聞○予奉使道李委散秩大臣伯爾勒英祭葬優卹○以知府陳寶善同知魏炳燾交左宗棠軍營差委○予新疆陣亡總兵丁遠學等祭葬世職○丁酉王家楨奏查道光二十四年 欽定禮部纂修則例內開盛京兵部所屬站丁係吳三桂尸下逃丁及僞官子孫承充八旗戶下帶地投莊頭實與家奴無異本身及子孫均不准其捐考等語臣查旗民家奴尙有伊主放出後扣足三代所生子孫與平民一例應考之條而此項站丁節經歷任盛京兵部侍郎永福兆惠富德花尙阿善敏書元戶部侍郎延煦等奏請照戶禮工三部所屬官丁一體准其考試均經部駁在案在部臣屢議而屢駁者固守先年之例案而諸臣屢駁而屢請者實察歷久之情形臣謹詳查歷次成案考證乾隆嘉慶年間部頒 欽定學政全書及近時續增科場條例竊見其中有可疑者三有可憫者三請爲 皇太后 皇上陳之永福兆惠富德花尙阿四次奏請見於 欽定學政全書者皆在嘉慶十九年以前部駁皆以驛站緊要恐准考則有力之家盡以讀書爲名規避差使致誤驛務並無一語謂係吳逆逃丁也至嘉慶十九年將軍和寧與書敏不合始有係康熙年間招安吳三桂尸下逃丁四百四十名編爲二站之語此可疑者一也永福初次奏請

在雍正八年其時去吳逆平時未遠欽維 世宗憲皇帝聖明英察無事不在 聖鑒之中臣恭查雍正五年杭州織造孫文成奏事奉 硃批凡百奏聞若稍有不實恐爾領罪不起須知朕非生長深宮之主係四十年閱歷世情之雍親王也 聖諭嚴明莫能欺飾若此乃永福此奏惟奉 上諭事雖應行但此途一開俱各染於漢習而於漢仗武藝正項差使恐不無懈弛之處等因欽此若站丁皆係官子孫承福隱飾不奏復爲陳乞 天語有不謹竄及之乎此可疑者二也和寧謂康熙中招安逃丁編爲二站亦未指明何站其實盛京兵部所屬二十九站皆設自順治二年人數既多歷年又久生齒自必蕃衍今日皆吳逆逃丁之後豈原設二十九站各丁竟無一丁有後乎且逃丁但編二站卽陸續投回並拿獲者及僞官等家口亦撥其中必不至合二十九站全額一律換盡也此可疑者三也不特可疑亦實可憫原設二十九站站丁世受 聖朝家養例准考補驛丞何敢必希上進但因一二站編有招安投回之人遂使二十九站站丁祖父子孫同受不韙之名不准上進必非其心所安其可憫者一也臣又查咸豐四年部駁書元所奏內稱若因其情殷報効遽准代魁 恩施破除成例是但爲數千餘兩之徵費贖二百餘年之大法等因臣敬思卽和寧所奏編管二站係在吳逆初平之際其時去明亡未遠或因頑民尙多不得不嚴爲立法以一人心今海內涵濡 聖澤二百餘年卽吳逆捻逆回逆迭起終不能動搖人心況隨吳三

桂入滇兵丁初本非逃卒沐 聖祖仁皇帝寬大恩施招回根本重地迄今時歷 八朝七逢 大赦罪由緣坐愈遠愈輕例文所云本身及子孫若通始初編管之人扣算則除去原丁及其子其孫今之站丁早在四世以下矣其望 澤之心正不敢自外生成之心也其可憫者二也且近自軍興以來 朝廷議正仁育其裔從投回者出力則賞顯之散歸則安插之並未鋼其子孫罰及後世莫不感戴 皇仁而該站丁等但以 國初至今年代久遠冊籍難稽二十九站中莫能分別無以自明以近年裔從投回仰沐天恩浩蕩比較未免向隅其可憫者三也 臣愚以爲留都實根本之地養養本予以自新現今站丁生齒益繁障務不至懈弛拔其秀雋於移郊移遂之後正以昭 列聖教化之神育材之中卽以固本臣不敢以案經屢駁緘默不言下部議奏○遺載敦致祭 慕陵○允署福建巡撫吳贊誠開缺仍督辦船政事宜○戊戌諭延照奏查明蒙古案件積壓緣由請申明爲例辦理一摺據稱蒙案關提人證向由該盟長及各旗解送乃近來輒以羣差患病等詞支飾延宕不解其各旗應備烏拉亦多不應甚至命盜重情該旗擅取供詞率請了結種種弊端不一而足亟應嚴加整頓等語命盜重案應如何迅速辦結若如所奏積壓各情實屬不成事體著理藩院嚴飭早案圖昭烏達兩盟各扎薩克等先將積壓案內應解人證應備烏拉如有行提文到之日趕緊解送嗣後遇有案件務遵定例依限辦理倘再延宕支飾卽行指名

嚴參懲辦至稅務司員辦理蒙案是其專責倘有延擱勒指及失察背役需索等情卽著該都統從嚴參處另片奏都統管理兩盟嗣後各旗再有玩視重案之事該都統不卽奏參請飭部議懲處等語卽著兵部妥議章程具奏○己亥諭都察院奏請撤銷御史京察一等並自請議處一摺據稱抽查漕糧御史英震才具似尙開展因係上屆京察一等之員此次仍列入一等現爲御史樓舉齊奏參英震舉齊同辦一事如果秉公持正何至爲同官揭參且聞該御史攜帶伊子在差次居住難保無招搖生事之處將該員一等行文吏部撤銷等語著照所議辦理該衙門堂官於保薦時未經查出均著交部議處至該御史攜帶伊子在差次居住有無招搖情弊著倉場侍郎與樓舉齊所參各節一併確查具奏○庚子諭裕祿奏本年十一月間有湖南候選道夏聲律在安徽設立勸捐分局既無貴州巡撫奏咨案據又不將委札呈驗該員並非貴州職官所稱奉委辦捐是否確有其事請飭查明等語道員夏聲律前赴安徽辦捐是否奉有貴州巡撫札委抑係委在湖南勸捐何以私自隨地勸辦著貴州巡撫卽行查明具奏○飭李鴻章嚴備直隸承德府應交米石○辛丑 上諭 太廟行禮○允故四川候補道龔開於本籍建祠事蹟交國史館立傳○桑春榮以病乞休不允○癸卯諭祭 太廟遣奕訢恭代○寶廷奏爲時政至寬當救以嚴敬陳管見以備 採擇一嚴程限邇來 旨下各部各省議行事率任意延宕閱時甚久視 上意漸

解則含糊覆奏或竟置不答而 朝廷亦遂不復問矣數年間屢求直言臣工疏陳事多得 旨飭行至
今畢竟興幾利除幾弊哉良法美意徒存紙上耳因循戒玩中外相習成風觀於延煦所奏蒙古案件積
壓可見矣乞 命軍機大臣統稽各部各省數年來奉 旨議行事未竟者凡幾 嚴飭促之再延則懲
勿宥嗣後凡 旨下各部各省事乞量其大小難易嚴定覆奏限期毋許逾越其事涉委曲繁重實難依
限者亦使將大致隨時先行奏知而 皇太后聽政之暇可擇其重大者識之不時考核有仍延宕者
特旨嚴譴之庶頽風一振而實政可行也一去欺蒙人臣之罪以欺爲大邇來中外大臣於奉 旨覆奏
事件每多方掩飾不肯據實自陳甚至割裂例文俾會成案強藉以伸其說而各省查辦事件尤多調停
遷就試觀近年覆奏查辦之事有幾如原參者豈言官無一非妄語耶此皆因 皇上尚在冲齡 皇太
后深宮高拱外事罕聞而樞臣則以 朝廷既已從寬何必獨爲己甚遂至中外恣爲欺蒙而不知顧忌
矣伏乞 嚴飭樞臣嗣後凡覆奏查辦等事務當悉心察核有敢欺蒙者卽據實指駁若隱而不言經人
糾參以徇庇論庶羣下有所嚴憚不敢輕 朝廷否則大臣欺蒙樞臣徇庇是使 至尊獨坐社稷也
國事尙可問乎一慎赦宥赦宥出自 特恩非罪臣所敢妄希尤非他人所敢妄稱也邇來獲罪廢員捐
輸報効每有代爲援案乞 恩者使破格 鴻施幾爲成例此端開則廉吏家貧難沐 聖恩而貪官有

金轉得倖逃法網矣人亦何畏而不貪也今雖度支不足然尙不缺此數千金而納微金竟抵重罪金何重法何輕耶開冀倖之門紊賞罰之章所得小所失大何以示懲儆而戒將來耶漢賈禹云風俗敗壞皆起於犯法者贖罪入穀者補吏捐例大開以來名器已多濫矣尙賴有法以糾之或知所畏耳此例再開小人吏何顧忌耶前有 旨停捐仰見 聖明伏乞再降 旨嗣後廢員有報効者但據情以聞勿許援案代爲之請其情可矜而才有可恤者出 特旨宥之否則概勿收斯臣下羣知 國法不可倖免官箴自肅矣奴才自知位卑勢孤難干眾怒而還念宗室世僕受 國厚恩職司記注睹茲時局安忍不言苟利 國家違恤其他昧死以陳不勝戰兢恐懼待命之至 上諭寶廷奏敬陳管見一摺所奏嚴程限去欺蒙慎赦宥各條不爲無見各部各省遇有議行事件自應遵限迅辦何得任意延宕甚至日久含糊覆奏或竟置若罔聞似此疲玩因循尙復成何事體向來科道各官原有稽查之責嗣後著實力奉行不得虛應故事其事關緊要應行查核之件并著軍機大臣隨時認真稽查各省奉旨查覆之件尤當逐一稽考如遲延不覆卽著據實奏聞定將該督撫嚴懲決不寬貸中外大臣於覆奏事件倘有掩飾欺瞞甚或割裂例文傳會成案以伸其說查辦事件如果調停遷就皆不能逃朝廷洞鑒嗣後軍機大臣益當悉心察核毋稍徇隱赦宥本非營政從前起用廢員均擇其情節較輕實有可原者酌量錄用此中自有

權衡嗣後廢員如有報効著據情奏聞不准援案代爲聲請以示限制○諭御史戈靖奏請禁官差訛索一摺京師地面各衙門設立官差原所以供緝捕若如該御史所奏在官差役往往與賊相通容噉分肥以起賊爲名轉相誣陷昨有中城水局公人帶領獲賊誣拿成衣鋪杜姓拷問並搜取銀錢之事尙復成何事體著步軍統領衙門順天府五城御史議定章程嚴行禁止並甄別紳董賢否以期得人遇有公差訛索卽行從嚴懲辦俾靖閭閻○諭劉慶麟奏近聞戶部三庫每於放欸之日輒有土棍假冒宗室糾集多人在三庫左近地方設局誑騙將領項之人及庫兵書吏等擁誘詭詐甚至剝取衣服逼寫欠票字據各情請飭查辦等語庫儲重地支放俱關緊要豈容匪徒恣意橫行若如所奏屬實尙復成何事體著步軍統領衙門順天府五城御史確切查明一體嚴拿務獲懲辦並飭令地方官出示曉諭隨時實力稽察遇有此等匪徒卽交刑部從重治罪○戈靖奏鄉試年老諸生但能三場完竣不問文字佳否卽爲奏請 賞給副榜舉人會場完竣則 賞給司業編檢職銜所以勵情宵旰經之儒典至渥也其初每省不過一二人或至四五人而近來各省所報老生多倍於前臣前官禮部每見老生學冊甫經入學卽填註七十八九十者一遇科場各省撫臣卽援例奏請 恩賞難保其不虛填年歲冒充年老濫竊榮名在部臣止憑學冊之填註從無有駁斥者臣謂自今以後 飭下禮部欲核老生之年歲須查其入學年

分已滿三十年以後者爲眞卽再寬爲定限必入學已過二十年或十年以後者方准奏請 恩賞其甫經入學雖填註八十九十者概爲駁斥是亦慎重名器之一端下禮部議奏○命廣壽爲閩兵大臣○以文煜爲刑部尙書崇厚爲左都御史文徵爲工部左侍郎調全慶爲工部尙書成林爲吏部右侍郎轉崇綺爲吏部左侍郎以志和署左都御史○是年統計出口貨直銀六千七百七十七萬二千一百七十九兩進口貨直銀七千零八十萬四千零二十七兩相抵虧三百六十三萬一千八百四十八兩凡徵貨稅銀一千二百四十八萬三千九百八十八兩

光緒五年己卯春正月乙巳朔元旦節 上至 奉先殿行禮 慈安端裕康慶昭和莊敬皇太后 慈禧端佑康頤昭豫莊誠皇太后 御慈寧宮 上率諸王大臣行慶賀禮 御中和殿受禮太和殿受賀至 大高殿拈香○丙午命王文韶在軍機大臣上行走○戊申以京師緝捕出力予陳鴻春張士傳等升敘有差○上詣 壽皇殿行禮○庚戌以孟春時享 太廟 上前期親詣行禮○命全慶管理京師火藥局○諭黎培敬奏已故革職總督遺愛在民請開復原官予諡立傳建祠一摺已故總督賀長齡於道光年間由翰林洊擢封圻嗣因在雲貴總督任內辦理回務不善兩次獲咎欽奉 諭旨革職其平日能勤官守則拔擢以獎其功迨措置乖方有關全局則斥革以正其罪 先期於進退人才實已權衡至

當聚培敬卒敢臚列賀長齡生平政績以開復原官予諡立傳建祠爲請殊屬賈昧且所陳治行皆身任封疆者分所應爲之事何得任意鋪張冀邀異數至賀長齡係湖南人該撫亦湖南人更難保無徇同鄉之見所請著不准行仍交部議處以示懲儆予諡爲易名大典豈容稍涉冒濫嗣後各該督撫當懷遵同治十二年閏六月二十五日 諭旨不得率意陳請尋吏部議聚培敬降三級調用不准抵銷允之○辛亥頒給陝西 華嶽廟匾額○上詣 太廟行禮○癸丑廣東巡撫張兆棟奏請註銷其子張仔議敘員外郎不允○丁巳 上詣 大高殿 壽皇殿行禮○戊午前幫辦陝甘軍務道政使劉典卒賜卹如侍郎例戰績政績交國史館立傳賞其子同知本鑑以知府用主事本鐸以員外郎用尋賜祭葬諡果敏○庚申武陟縣沁河漫口合龍○辛酉崇厚奏請 敕建上海天后神祠以餘屋作爲出使公所得 旨允行○壬戌諭前據御史樓譽普奏參御史英震抽查漕糧營私舞弊又據都察院奏英震攜帶伊子在差次居住雖保無招搖生事之處先後降旨令倉場侍郎確實具奏迄今將及一月未據覆奏實屬遲延著倉場侍郎將英震被參各節迅卽查明據實具奏不得稍涉含混○癸亥諭春福等奏請將擅挪軍餉之佐領革職嚴追等語烏里雅蘇臺換防之綏遠城鑲白旗滿洲佐領諾敏前在山東催餉迭次虧挪銀一千五百九十兩之多前經額勒和布等奏參摘去頂戴飭令回旗措繳該員延不完交實屬膽玩諾敏

著卽行革職並著瑞聯就近嚴追勒令如數交清以重帑項而儆效尤○甲子調成乎爲廣東布政使以長廣爲河南布政使崧駿爲廣西按察使○乙丑戶部奏爲遵 旨停止捐輸擬將 戶部京捐局先行裁撤查會典內開戶部捐納房掌捐納之事凡報捐以監職銜加級紀錄 封典等項俱由部具呈交銀給與執照凡遇暫開事例一併管核等因所謂暫開事例者於常捐之外暫准捐納實職歷溯從前或因軍務或因河工款項不足開捐濟餉事竣卽停追咸豐元年十一月間奏開籌餉事例其時軍務迭起需餉浩繁部庫空虛岌岌可慮不得已爲權宜之計捐輸之外如鈔票官錢票鐵錢當百當千等大錢皆倉卒補苴以資周轉然行之未久弊竇叢生不特無裨 國儲抑且有妨民用業經陸續奏請停止循行至今者惟營十大錢及捐輸兩事營十大錢京城市廛行用相沿已久未便遽廢更張捐輸則庫款度支不無裨益且係捐生情殷報効並無抑勒苛索等弊是以未請停止惟是開捐以來各省相繼奏請設局減成折收捐納實職條例頗多內如關係較重之捐納武職捐免離任捐免驗看等項業經 戶部隨時酌核先後奏停而捐章收數既減捐生集資較易一經核准銓選分發卽是實官其中賢否錯雜一時誠難辨別且捐局林立各不相下收捐上兌互有低昂亦難保無影射取巧之弊誠如 聖諭自應及時停止以肅政體至籌款相抵一節查咸豐四年七月間 臣部奏設捐銅局同治十三年六月奏改京捐局並令禮部

鑄造條記派員經理收呈發照等事按冊具奏其銀由捐生自行繳庫以近年收款論之各項寶官外省減成較多捐生避重就輕在局報捐者少約計一年所收不過五六十萬兩其中以分先分間前儘先前新班遇缺新班遇缺先謂之銀捐爲外省不准兌收者銀數較多此京捐局每年入項之大概也若支用之款除寶全寶源兩局每年工食銀二萬四千兩京捐局每年經費兩次奏銷銀二千四百兩均由平餘項下開支不動正款外惟內外火器營差操公費一萬二千兩遇閏之年加增銀一千兩由該營奏准由捐款項下支給此外均歸大庫搭放兵餉之用若將銀捐停止則常捐應收者如加級紀錄免保舉等項以現在計之一年約可收銀十萬餘兩將來外省捐局一律停止歸復捐納房收捐發照舊章則庫款尙可加收如目前實有不敷再由臣部體察情形於續撥京餉案內奏明辦理此京捐局支用之大概也至京捐局銀捐等項及各項寶官並常例未載條款同火器營章程臣部自奉到 諭旨後業經停止收捐統俟具奏四年分十二月各冊捐生獎勵及四年分下半年經費奏銷時將臣部京捐局卽行裁撤條記送部繳銷所有常例應收之款如加級紀錄等項統按舊章歸臣部捐納房付庫兌收隨時核准給照歸入咨案辦理其京捐局經費亦卽停止至火器營差操公費核計常捐所入尙敷支放仍令照舊關支其戶工兩局工食尙係平餘項下開放此次銀捐既停平餘自少不敷之數卽由捐款項下動支俟銅運

暢行再復舊制此京捐局裁撤以後之大概也伏念肅清政體自以停止捐納實官爲第一要義應請將籌餉事例條款概行停止以昭畫一並請 飭下有捐省分各該督撫遵照 諭旨一面迅速設法籌款一面將捐務趕緊清釐造冊報部隨即裁撤捐局所有照根空照分別截清數目咨部繳銷統限於本年五月悉數截止其有於限外投冊者無論出咨在先概行發還所有填發空照核駁之案迭經臣部於核覆請獎奏咨案內隨時行令追繳應通行各局將前奏奏駁令追繳空白執照各捐案趕緊勒限追還送部仍先行開列清單報部備查至各處捐生前經部駁令補交銀兩者限外應令在部庫補交均不准改獎移獎其辦理賑捐省分但據奏報捐數業經奉 旨照章給獎並未造冊到部及尙未奏報者若不示以限制則請獎實官與捐納實官無異應令於限內趕造清冊報部由臣部核給若逾限到部不准再請實官此外工程請獎報効軍火廉俸卹賞抵捐等項向按例銀核獎或按例銀加成核獎者仍准請獎惟限外祇准本身子弟請獎虛銜其未經截限以前向由部庫兌收仍歸銀庫上兌如此京捐先行截停外局嚴定期限該督撫等當念 朝廷澄清吏治之意決然定計籌款抵補不得輕聽局員率請展限希圖延宕 上諭戶部奏遵旨停止捐輸一摺肅清仕途自以停止捐納實職官階爲要該部業將京捐局銀捐等項及各項實官並常例未載條款火器營章程均行停止即著有捐省分各督撫將籌餉事例條

款概行停止以昭劃一並一面迅速設法籌款一面將捐務趕緊清理造冊報部所有照根空照分別截
清數目咨部繳納統限於五月悉數截止該督撫等自能仰體朝廷澄清吏治之意不致輕聽局員率請
展限希圖延宕另片奏請飭將支用捐款開單報部等語捐項均關國帑自應詳晰報部著各督撫將辦
捐以來所收捐款入於何年何月何項冊內無論已未奏銷均逐款詳查開單報部其收受捐款省分並
著一律咨部以憑查核○江西按察使國英因病乞休允之以沈保靖為江西按察使○諭照祥奏請補
副護軍參領一摺正藍旗副護軍參領著英裕補授餘依議摺內應行三摺字樣誤寫雙擬殊屬不合照
祥著交部議處○予盛宣懷亡傷亡員弁勇丁分別建祠○戊辰諭內閣朕奉 慈安端裕康慶昭利莊
敬皇太后 慈禧端佑康頤昭豫莊誠皇太后懿旨三載考績為國家激揚大典中外滿漢諸臣有能恪
共職守勞勩最著者固宜特加甄敘其有年力衰邁者亦難曲予優容茲當京察屆期吏部開單題請詳
加披閱恭親王首領樞廷親賢夙著殫心輔弼悉合機宜大學士寶鋆協辦大學士兵部尚書沈桂芬戶
部尚書景廉禮部左侍郎王文韶同心竭贊共矢公忠前經得有革職留任處分均著加恩開復大學士
直隸總督李鴻章宣力有年實心任事大學士陝甘總督左宗棠肅清邊塞懋著勩勞兩江總督沈葆楨
任事精勤不辭勞怨均著交部從優敘敘戶部左侍郎殷兆鏞年逾七旬精力尙未就衰惟戶部事務較

煩辦理恐難周到著調補禮部右侍郎毋庸兼署吏部左侍郎仍在上書房行走工部右侍郎德椿理藩院右侍郎惠泉內閣學士載慶體弱多病均著以原品休致餘著照舊供職○以徐致祥署理吏部左侍郎轉潘祖蔭爲戶部左侍郎調宜振爲戶部右侍郎龔自閔爲工部左侍郎以啟秀爲工部右侍郎錫珍爲理藩院右侍郎○諭前據樓營奏參御史英震抽查漕米營私舞弊又據都察院奏英震攜帶伊子在差次居住難保無招搖生事之處前後降旨令倉場侍郎確查茲據桂清等查明具奏英震雖無得贓縱容偷米情事伊子前往差次省視亦無招搖生事之處惟該御史於漕糧偷漏之案並不認真懲辦任令伊子時常往來致招物議殊屬不知違嫌英震著先行交部議處至請獎員弁據稱查共咨獎二十六名與樓營所稱十七名不符內十三名一單書吏供係英震面交何以樓營亦同判行難保非該吏影射並據該吏供英震家人林大有干預保獎情事等語著該衙門將開科書吏解交刑部審訊並著英震將林大交出送部歸案訊辦英震著聽候傳質另片奏復奏遲延桂清近因患病請假舉道連請旨議處等語桂清舉道連發一併交部議處○己巳調裕寬爲廣東巡撫以李明墀爲福建巡撫張樹聲爲貴州巡撫陳士杰爲福建布政使譚鈞培爲山東按察使○予前任工部左侍郎何廷謙祭葬贈卹如例○命志和恩福馳往吉林查辦事件○庚午以傅慶貽爲安徽布政使調譚鈞培爲湖南按察使以盧杰爲

山東按察使○刑部尚書桑春榮因病乞休允之○辛未涂宗瀛奏賑務稍鬆需款較緩請將推廣五省賑捐專摺督飭賑並本省外省賑捐催辦核獎待 旨如所請行○以翁同龢爲刑部尚書添補該爲左副都御史調王文韶爲戶部左侍郎以祁世長爲禮部左侍郎○壬申諭前因科爾沁扎薩克達爾罕親王棍布旺濟勒被參各款經理藩院查明覆奏當經降旨將該親王議處茲據御史田泰奏風聞理藩院查取該旗各結乃正盟長句串所報達爾罕親王性情暴虐苛派勒索非止一端從輕議處不足以昭平允請飭盛京將軍會同該盟長確查等語此案既據理藩院查明棍布旺濟勒借用屬下銀至三千餘兩之多業經交理藩院議處並責令將借款照數償還若將已結之案再行派員查辦徒事紛擾亦非政體所奏著毋庸議蒙古各旗民生艱難該扎薩克掌管印務必應體恤屬下豈容稍有擾累嗣後各該旗如有肆行科斂貽害蒙古地方者一經查訪得實定當從嚴懲辦決不寬貸○以崇勵爲左副都御史潘祖蔭著工部左侍郎○癸酉丁寶楨奏查川省臬司道府向來除養廉外別無津貼之款而養廉項下例有扣平搭票折錢及本省應行攤捐各款層層減折所剩無幾從前收受節壽規禮非此無以辦公贖家故二百餘年相沿未改中外共知實有不得已之勢然終非正辦去年秋間臣以川省藩臬向亦收受陋規名義尤爲不正當經飭令刪裁之後辦公竭蹶川省全年正額丁糧共止六十餘萬向無極折漕費

等項與江西安徽等省可以取資於漕羨者情形不同省庫實無閒款可籌惟自去冬開辦黔邊鹽務以來各岸局於購鹽售鹽之際照商行收扣平餘銖積黍累湊少漸多原以備各該局一切公費茲據總辦局務候補道唐炯稟稱各該委員等均能實事求是共矢清白力求節省咸願將此項餘積辦公銀兩擬俟積有成數卽以提撥各道府每年辦公之用等情查此項收扣平餘既非課稅羨截正項所入且又係各局員節省所積並非另取之公家且視別省漕折公費取自民間者更有區別以之提撥道府公費實爲名正言順臣現擬自光緒五年正月一起卽於黔邊鹽局收積平餘備公項下酌量提出成數視各道府缺分別繁簡均勻分撥准其備文赴局領回作爲辦公經費各該道府既有此領款辦公不致掣肘卽明定禁令嚴飭自光緒五年正月一起將從前一切節費規禮永遠裁革不准再收分毫以勵廉隅而資表率如查有私受規禮情弊卽將該道府指名嚴參並將私自餽送之州縣一併參處用昭儆惕在上官無須取給於屬員自不難破除情弊而整躬率屬使屬員無從求媚於上司不敢不恪遵 功令共肅官方以抑大法小廉吏治自有起色下戶部知之○諭前據內務府奏恭備要差請飭山東於積欠帑恩銀一百八十餘萬兩先行籌解銀十萬兩當諭令文格於本月正月內解到茲據該撫奏稱此項生息銀兩業經開撥鉅奏准每年酌解五成通計共祇欠銀六十五萬一千一百餘兩並無一百八十餘萬兩之多現在措

解銀五萬兩等語內務府前奏拖欠帑息一百八十餘萬兩銀數因何不符之處著該衙門查明具奏其未解之五萬兩仍著該撫陸續籌解○甲戌命豫親王本格惠郡王奕祥貝勒載澂載瀅奉恩鎮國公奕謨爲隨扈王公○諭前因光緒三年五月間天津寄存軍械倏被火災燒去銅帽帳棚等件李鴻章並未將數目價值詳細奏聞嗣經諭令該督查明被燒之件核計價值若干及有無遺失餉銀據實具奏茲據奏稱天津城內水月庵寄存軍械計被燒銅帽九百餘萬粒自來火子八十餘萬粒帳棚六千四百餘頂馬步鎗五千五百餘桿礮車三十八輛及手鎗皮紙門火馬鞍木架等零件共合價銀四萬五千餘兩因係照例免賠是以未經具奏此外各軍餉銀並無遺失等語局存軍械理宜嚴密巡防此次被燒之件甚多實非尋常倉庫物件猝遇水火可比所有被燒軍械除擇修搭放外其餘仍著責令承管各員分別酌賠以示懲儆並著該督嚴飭在事之員嗣後務宜周密防範不准稍涉大意

二月乙亥朔諭閣倣銘曾國荃奏賑糧不敷請將東漕足數撥充賑需並請撥山東豆石各摺片前因山西復被旱災撥給山東漕米十二萬石以濟賑卹此項漕米計至本年二月間卽已放竣該省飢民甚多麥收又晚青黃不接之時仍恐無以爲生自應妥籌接濟所有光緒四年山東經徵漕米應交通倉之八萬餘石著照所請卽行儘數撥給山西俾資賑濟山東前欠解協濟山西運腳銀六萬兩及此次陸續經

費輕彌等項運通水脚雜費銀三萬數千兩著文格一併撥交王定安以資應用至山西因早歉收豆種尤缺並著將山東上年所收豆子二千七百餘石隨同此次漕米全數撥解山西毋稍延緩○諭王炳奏督省麥苗稀少請速籌雜糧籽種一摺山西上年又復被災麥苗稀少亟應採買雜糧以爲籽種之用據稱直隸雜糧甚賤請飭將山西所收各省賑捐銀兩派員赴直隸採運著會國基卽將此項銀兩派委委員迅速前赴直隸採買雜糧運晉以資散放如山西現有雜糧卽著先行撥給籽種俾民間得以及早耕作另片奏風聞山西候補知府趙懷芳於光緒三年冬間奉委赴周家口買糧該員攜銀六萬兩回原籍安徽正陽關一帶採買運至四年夏季尙未運糧到晉並有賤買貴賣浮冒支銷等情請飭確查等語著裕祿閣敬銘會國基確切查明據實奏毋稍徇隱○以許庚身署禮部左侍郎○命奕仁告祭 神牌○丙子諭內務府尋遵查山東積欠帑恩銀數開單呈覽一摺據稱山東省自道光四年起至光緒四年止共欠解該衙門銀一百八十餘萬係兼奉裁筆帖式養廉等款在內該省奏稱祇欠銀六十五萬一千一百餘兩或係專指生息一項等語此項數目究竟因何不符著文格按照單開各款確查具奏其未解銀五萬兩仍著該撫卽行撥解務於二月中旬如數解齊以濟要需○以剿辦越南匪徒撥邊出力予副將莫傳喜知府鹿傳霖等優敘○岐元崧福王家鑑奏昌圖府屬新設縣學各缺援案擬設廟額下部議

奏○丁丑諭文格奏查明前築黃河南岸新堤報銷外銷一摺據前署山東巡撫布政使李元華所辦黃河南岸堤工實係四十五里前曹州府知府馬映奎估報六十餘里現據該員稟稱係將填補坑溝土方及河灘加倍工力歸堤長里數核算當時並無案據而李元華歷次奏報均係七十餘里至堤身高寬丈尺馬映奎承修時李元華曾令隨後再行加築輒以豫擬未辦之事報爲已竟之工高寬丈尺均有增添其工需銀兩馬映奎報用銀二萬八千四百餘兩該前署撫奏銷五萬一千兩計浮多銀二萬二千五百餘兩據稱歸入防汛動用查堤工奏銷案內並未聲明勘撥防汛經費項下亦未將此項作收造銷馬映奎收支冊內有此款目核計尙多銷銀一千兩請勒令李元華賠繳並將該前署撫等分別議處察議等語工需均關國帑應如何慎重查核李元華於堤工里數丈尺概不核實奏報復將銀兩任意挪移此外尙有多銷銀數種種不符殊屬不成事體李元華著交部議處並將多銷之銀一千兩先行勒令賠繳其修築堤工餘銀二萬餘兩所稱歸入防汛經費動用是否確實著戶部工部文格詳細查明倘有不實不盡一併勒令賠繳以重帑項馬映奎將填補坑溝等項歸併堤長里數計算未經先行據實稟辦殊屬不合著交部察議尋議李元華革職馬映奎降一級調用准其抵銷○戊寅諭前據御史王炳奏山西候補知府趙懷芳採運賑糧延浮冒等情已諭令閩徽銘會同查核茲據閩徽銘奏參趙懷芳運

糧巡延請旨降補拔去花翎並自請職處請飭安徽巡撫就近嚴查該員採糧有無情弊各摺片趙懷芳在安徽採辦山西賑糧時逾半年始由水路運竣殊屬延玩著拔去花翎以同知降補開缺銘委辦不慎著交部議處據稱安徽委員趙懷芳在大安州等處採辦各行店底簿與該員原報懸殊等情著問敬銘卽飭趙懷芳前赴安徽聽候查辦由裕祿提集各行店嚴行查訊澈底根究據實參辦毋稍徇隱○己卯李瀚章奏樊口創建石閘前奉 諭旨遵卽飭議舉行 奏明在案月餘以來經臣等迭次屬催據武昌府知府方大湜轉據武昌縣知縣凌心坦等稟稱遵各曉諭周知一面邀請紳耆來城會議該縣向分內外八鄉內四鄉紳耆竟無一人進縣僅傳到城紳王家瑞王羽儀陳之儲三名西楊畝生員葉芳閔霖洛二名議請建閘約需工費七萬畝內民糧不過二千有奇應在於內四鄉及江夏黃岡大冶三縣派費興修均由該紳等開報復經傳到監生杜承恩武生余燦紳耆郭培城三名稟稱受益之區自應協助惟聞工不敢承首等語先行稟覆前來臣等查集費建閘必須衆情欣願稍涉派累卽於 諭旨有違未便據武昌縣城及西楊畝一二監生之言遽行定斷現在該縣內四鄉暨江夏黃岡大冶三縣紳民尙無一人集議若僅就武昌縣城畝紳士開報處所違令外縣外鄉按畝出資難保無抑勒情弊當卽批飭再行設法分別廣爲勸諭公保首事趕緊集費承修務順四縣輿情不得任意苛斂仍飭嚴立條規重懲陋索

報聞○以護送賑糧出力予提督米慶參將李慶邱明禮等優敘有差○庚辰以全慶籍左都御史成林署戶部左侍郎○辛巳以景廉著吏部尚書廣壽著禮部尚書○癸未諭山西榮河縣知縣王性存侵吞賑銀查有實據著從重發往黑龍江効力贖罪○倉場侍郎桂清卒予祭葬○調繼格爲倉場侍郎轉長敘爲刑部左侍郎調啟秀爲刑部右侍郎錫珍爲工部右侍郎以阿昌阿爲理藩院右侍郎徐致祥爲內閣學士○甲申諭御史黃元晉奏陳管見一摺所陳裁減各局剔除釐務弊端各條不無可採各省向來祇有發賣清查各局嗣因辦理軍務設局漸增現在軍務告竣各局尚未裁撤開銷經費殊多浮濫著該督撫等體察情形即將各局裁撤歸併以節糜費辦理釐務各員自應力求核實妥爲經理若如所奏釐局訛案留難及浮冒支銷等情實屬不成事體著該督撫等懷遵前旨裁革漏規並將釐務弊端嚴查整頓遴派妥員辦理將該員銜名隨時報部倘有辦理不善及營私舞弊之員卽分別嚴行參辦另片奏請飭各省以養民爲務荒田則設法招徠開墾釐稅則勿因捐輸停止額外抽加等語現在各省民間元氣未復亟宜加意培養該督撫等務當督率屬員勤求民瘼開闢利病應興應革之處次第講求認真妥辦用副朝廷軫念民依至意○黃元晉奏天下之大利在東南 天庾之正供在漕運溯自黃河北徙空捨窳撙以致運河阻滯不得已改爲海運原係一時權宜之計查李鴻章等減定江蘇漕額以河運經費

作爲海運支銷每石不得過七錢之數係按照從前成案辦理嗣該省糧道以經費不敷逐漸增江蘇所加距一兩不遠浙江已加至一兩合浙江各省所收漕糧百餘萬石計之每年所增經費不下數十萬兩較之道光二十八年及咸豐二年辦理海運經費尙有節省歸公者大相徑庭而各該省尙復覬覦加增未知所底且海運涉歷重洋風波無定即使輪船暨利駕取得法確有把握萬有不測所關匪細河運雖覺迂滯而沿途安定漕糧可剋期抵通經費維均而自各該省以達京倉民之食其力者不可數計以必用之經費養內地無數生靈上資以裕國下藉以利民利民卽利國利莫大焉語云君道其常自禹貢以來數千年漕賦悉歸河運我朝列祖列宗所以經營黃河運河者殫盡心力不憚艱鉅聖謨深遠雖非臣下所及測然裕國養民意未始不寓乎此現在停運未久及時修復尙屬未晚再運數年河道日淤隄防日壞費鉅工艱難規復若不策長久徒爲苟安一時之計謂河運爲迂海運爲便不知河運迂而安海運便而險且其害尙有不可究詰者臣以爲出萬全非復河運不可擬請旨飭令該督撫等悉心籌辦俾河運得以規復大局幸甚民生幸甚上諭黃元善奏請飭規復河運等語國家歲輸東南漕糧以供京倉原以河運爲長策嗣因黃河北徙改行海運係屬權宜之計近祇江北漕糧試行河運爲數無多迭經臣工陳奏請復舊章特以修治黃運河道工煩費鉅一時未易集事該御史所稱

裕國利民以河運爲便現在停運未久及時修復尙屬未晚等語亦不爲無見晉河東河道總督清運總督及沿河省分各省督撫悉心籌畫如何浚治河道規復漕運之處酌度情形如有所見卽行詳悉具奏近聞山東歲修河道工程多有偷減所頒款項不能盡歸實用營私肥己弊竇滋多殊堪痛恨嗣後該管大吏務當破除情面嚴行查察督飭承辦之員將應修各工核實估辦如有浮冒草率情弊卽行從嚴參奏不得稍涉瞻徇○追予湖北殉難生員樊績等祭葬世職建祠○乙酉閏敬銘曾國荃奏恭奉 諭旨吉州知州段鼎耀於省局撥解賑銀贍取扣留不發令臣等查明具奏臣等查已革吉州知州段鼎耀於奉發賑銀並不立時散放復將前任李徵枋買補遺倉穀石私自糶賣暨捏稟捐廉買穀墊發籽種及墊買賑糧倉穀各情暨散放社義倉穀以少報多希圖冒銷影射抵扣賑銀不交殊屬貪鄙不法按例並刑部奏准新章應斬監候惟該革員於未定案以前將賑銀全數完繳例應減等事關侵扣賑銀情節較重未便增擬請旨遵行 上諭前據閩敬銘曾國荃奏山西吉州知州段鼎耀扣留賑銀不發降旨將該員革職審訊茲據閩敬銘等審明具奏此案已革知州段鼎耀於奉發賑銀四千兩並不散放將前任知州李徵枋買補遺倉穀石私自糶賣所稟捐銀買穀墊發籽種及墊買賑糧倉穀各情均係虛捏並無其事散放社義倉穀以少報多希圖冒銷影射抵扣賑銀殊屬貪婪不法被災省分閭閻困苦朝廷慮念災黎

惟恐一夫失所地方官應如何勸求民瘼盡心撫綏該革員喪心昧良膽敢肆意侵欺置災黎於不顧若不從嚴懲辦何以肅法紀而儆効尤聞敬銘等所奏請將革員照侵盜錢糧入己一千兩以上例擬斬監候或因侵扣賑銀於未定案以前全數完繳照例減等定擬等語殊屬輕縱段鼎耀著卽有正法以昭炯戒該州應行買補倉穀及其餘倉穀有無短絀著關敬銘等確查核辦○丙戌恩承童華奏遵 旨查明併臣大修都江堰新工並未體察水性率更濬制以致逼水灌川將新築石工冲刷大半各緣由查都江堰南北二江上游本係一水發自岷山自蔡李冰鑿離堆江水遂肇爲二後人因之作都江大堰堰之東爲人字堤東接離堆腳下西至江心堰首西向作分水大魚嘴正迎江溜左爲南江卽禹所導岷山正江也又名外江右爲北江卽冰鑿離堆所引之支流名之曰內江按四川通志內載李冰當日所遺深淘灘低作堰六字刻於石爲千古治水法則嗣是編竹爲籠納石於內築堤堰以資捍禦惟元明兩朝間有廢竹籠用鐵石者曾未幾何輒震蕩湮沒誠不若籠石相聯之力重罅空不與水敵且能洩水之爲便也凡此載在志乘歷歷可考 國朝四川巡撫憲德恩修都江堰一遵竹籠作堤之法道光年間水利同知強望泰最稱盡職亦以竹籠修堤是籠石一法我 朝二百餘年從未有更易者惟此次大修都江堰卷載係將舊鋪籠堤透底搗去改用石工先將河身挖深數尺加椿填石以鎮堤灰並加寬加厚堤身寬厚河

身必致遷寢其所修新工石堤又定爲一丈八尺亦屬過高是以去歲水發河窄則大溜順川堤高則盛漲難洩且係石工壁立逼水激冲遂將新堤一百三十丈冲刷過半所存石工無幾現在堤外砂礫中亂石縱橫其冲刷情形宛然在目核與該督所奏僅冲刷金剛牆三丈餘情形迥不相符 上諭前據給事中吳鎮奏丁寶楨誤聽道員丁士彬之言將濳壩堤拆毀有礙水利等情當派恩承章前往查辦茲據奏稱查明都江堰堤工原參毀掘石梁及淹沒田廬各節尙無其事惟該處徇用竹籠作堤此次全行揭去改用石工並加寬厚致河身逼窄水勢激衝將新堤一百三十丈冲刷過半與丁寶楨所奏僅冲刷金剛牆三丈餘情形迥不相符等語丁寶楨辦理堤工要務又值經費支絀之時宜如何盡心圖畫謹慎興辦乃憑丁士彬之言並不詳細查率吏成法敷衍興工以致被水冲刷又不據實奏陳追經降旨詢問仍以人字堤毫無損折等詞粉飾微陳實屬辦理乖方丁寶楨著交部議處前署成綿龍茂道丁士彬前署瀘縣知縣陸葆德承修堤工領款甚鉅現經查明做法與原稟懸殊難保無浮冒侵蝕情事丁士彬陸葆德均著先行交部議處仍交恩承章確查有無情弊據實具奏並著該督將此項工程迅速核實造冊報銷該部知道等因丁寶楨降爲三品頂戴留任丁士彬等革職○景瑞奏恭辦要差援案請撥款項一摺本年三月 穆宗毅皇帝 孝哲毅皇后梓宮永遠奉安朕奉 慈安端裕康慶昭和莊敬皇太后

慈禱端佑康頤昭懷莊誠皇太后啟鑒屢謁 東陵所有應修道路及應行預備各事宜需用款項著
直隸總督飭令藩司不拘何款撥發銀一萬六千兩迅即派員解交該衙門兌收以備支用○命廣德錢
寶廉馳赴山東查辦事件○飭各省州縣停案按程途遠近限定日期○諭鄭溥元奏請禁私銷私鑄等
語私銷私鑄本干例禁近來各省奸商往往銷毀錢文製造器皿並敢串通吏役開鑪私鑄寶屬不成事
體著各督撫飭令州縣嚴行申禁毋視為具文○丁亥諭前因丁寶楨李宗羲先後覆奏四川東鄉縣案
情節不符當派恩承章華前往查辦茲據恩承等奏稱已革大員供詞狡展請旨嚴訊並請將玩誤公事
之知縣議處一摺已革提督李有恆等經恩承等提訊復強詞狡辯忽認忽翻亟應澈底根究著恩承童
華嚴行審訊務得確情毋任狡展倘仍堅不吐實即著按照藩臬兩司並委員李傳駿等詳察各節秉公
酌斷定擬具奏至東鄉案內應訊之糧紳李開邦等經恩承等札令東鄉縣知縣路朝霖解省候審該
任意遷延迄無一人解到實屬玩誤路朝霖著先行交部議處○戊子諭正紅旗滿洲查旗給事中安祥
奏南新倉米色霉變不堪兵食倉御史鄧慶麟奏查詢霉變情形請旨辦理各一摺倉廩米石關係緊
要乃南新倉應放本月正紅旗滿洲甲米據該旗等查有米色霉變兵丁不堪食用實屬不成事體著景
壽寶壽慈前赴南新倉查看各廩米色霉變情形並將該倉米數認真盤查如有短缺情弊即行嚴參其

該旗應領本月甲米卽著戶部另行札倉趕緊開放○予前貴州巡撫韓超於貴州建祠○己丑予已故廣東布政司楊慶麟祭葬劉坤一等遵例請建交部議處○庚寅諭前因御史英震家人林六有干預保獎情事諭令該御史送出交部訊辦茲據刑部奏稱屢次片催迄未送部直至本日始據該御史以林六已於上年十二月間病故呈報林六是否病故抑或另有別情殊難懸揣請將該御史暫行解任傳質等語御史英震著暫行解任候傳質○追予江西鄱陽都昌等縣殉難鄉民建祠○辛卯以前任浙江提督鮑超住宅失火延燒 御賞各件依部議罰俸六個月准其抵銷其從前硃批未經恭繳者念其不諳體制且從前戰功卓著免革職處分○以文煜署兵部尙書夏家鑄署刑部右侍郎○壬辰以捐輸助賑予鮑源深等獎敘有差○賞烏里雅蘇臺官兵銀兩○丙申追予貴州陣亡知府鄒鍾泗建祠○以辦賑積勞病歿予屠秉鈺等祭葬○丁酉諭林肇元奏節省用款難籌請暫緩停捐一摺現在各省捐輸業經戶部遵旨覆奏諭令將籌餉事例概行停止林肇元所請暫緩停止黔捐之處著毋庸議至該省用度浩繁入不敷出亦屬實在情形各省應撥協濟該省餉項著戶部卽行查明嚴催各該督撫竭力籌撥源源接濟勿誤要需張樹聲到任後卽著通盤籌辦將該省防營酌量裁減一切用項力求撙節每年實需經費若干歲入之數若干近數年捐輸實在銀數若干據實分晰具奏再由戶部指撥有著之款抵補該

署撫卽遵奉前旨將該省停捐事宜趕緊辦理毋稍稽延○總理各國事務衙門奏竊臣衙門接准陳蘭彬函稱太平洋中有國曰山域治埃蘭譯耕檀香山共轄八島內有大島曰阿亞湖正埠曰漢拿老路爲各國商人聚集之所距廣東香港一萬六千餘里咸豐初年華人前往貿易繼以耕植畜牧合計止有千餘人自美國與該國立約通商互相免稅生計日蕃又值金山土人逼逐華工因之前赴該島者添至七八千人游手既多華商經理無權土人浸滋疑忌現據同知銜陳國芬等聯名稟請該大臣就近派領事官駐紮檀香山一切經費各商情願籌備等語查陳國芬請設領事原係該處急務惟未經換約之國既不便設立領事又不屬美邦非使美之員所能派設但念此地本爲出洋要衝又爲金山後路且係秘魯來華中站若得有人照料爲中國數萬窮民棲身謀食之地亦屬相宜并查陳國芬係廣東香山縣人已在該島貿易有年華洋夙著聲望可否變通酌辦或由南洋大臣或由兩廣總督或由該大臣發給商董諭帖飭令陳國芬隨時稽查約束卽將該處華民人數若干作何生業有何章程料理限於一年之內稟報如所辦實合機宜隨後卽可接辦否則卽將諭帖撤銷各等語臣等查泰西有約各國業經請派出使大臣前往駐紮且於英國新嘉坡美國舊金山各處設立領事官原爲保護華民在外貿易傭工起見檀香山與中國並未立約原未便按照各國在於該處設立領事惟現據該大臣查明該島華民聚至七

八千人之多若不妥籌保護時加約束誠恐華民愈聚愈多該島之人漸生忌嫉他日更難辦理該大臣現擬發給商董諭帖交由陳國芬稽查約束并擬嗣後或辦或撤再行隨時酌度原於保護之中仍作權宜之計今若由南洋大臣或兩廣總督發給諭帖地在萬里以外未免遙制為難自以由出使大臣就近辦理較為合宜得 旨如所議行○戊戌伯彥訥謨帖等請以告養待衛改補協領之那斯庫仍舊賞給待衛差使不允○以捐輸賑銀予提督唐定奎等優敘有差○己亥諭本年三月二十六日 穆宗毅皇帝 孝哲毅皇后梓宮永遠奉安朕恭奉 慈禧端佑康頤昭豫莊誠皇太后啟鑒敬詣 山陵踰路所經降道清塵以及預備各項車輛勢不能不借資民力第恐承辦各州縣分外苛斂假公濟私轉滋擾累著順天府尹直隸總督嚴飭承辦各州縣及辦差官員務須潔己奉公倘查有藉差科派貽害閭閻者即著指名嚴參其隨行太監校尉並各項廝役人等隨駕外出雖保不恃眾橫行沿途滋事尤宜嚴行查禁著內務府鑾儀衛各堂官先行曉諭首領太監及校尉等毋得恃眾滋事如有強取民間什物者一經查出即照搶奪例治罪毋稍寬縱○庚子文格奏籌款挑挖運河以備來年清運查東省運河袤延千餘里近因黃水改道局面頓更漕艘經行之處在南路疏濬湖河尙可設法辦理而北路則為黃水所穿運河久已斷流若不借資濟運此外別無良圖應如何酌辦以保漕運

全局奴才已函商河臣與之南北兼籌另行妥議奏請 聖裁至來年漕船經行河道自應遵照部議先行分別挑修以免臨時貽誤查南路運河歷年均歸河臣承辦北路由東省經理奴才現亦照案將北路運河工段飭委東昌府知府程繩武勘估茲據本年因南漕改由海運河道未經挑挖夏間籌辦回空漕船僅於張秋口門一帶疏平厚淤下游尚未興挑伏秋兩汛期內水勢盛漲加以衛水倒灌頂托黃流淤益甚查勘東阿縣情形為最陽穀次之其餘各州縣擇要中之要酌量挑修按照土方工程撙節估計共需銀三萬五千六十兩一錢五釐等情奴才覆加確核尚無浮冒應即由司庫發給俟春融冰泮之際趕緊集夫興工至姜莊舊運河久已淤阻舟楫不通奴才前以漕船入黃須由史家橋繞越上駛頗形艱阻復以北溜勢弱恐上游都向南趨竟至無黃可借擬俟冬間將姜莊舊運河仍行開挑庶北溜無虞水竭而船行亦較便捷曾經奏明在案茲查黃流全注八里廟情形變遷若再挑通姜莊舊河則北運口門愈形喫重惟有暫節此費再行察看情形辦理至南運河係由十里鋪入黃汶水尚高於黃然其來源能否暢旺以東平州屬之戴村壩為蓄汶濟運最要關鍵自該處壩工衝毀後歷年因經費支絀均係酌建草間障水至分水 龍王廟以利漕行但其工料終非實資抵禦本年伏汛期內復被衝決至汶水旁入大清河而運河愈弱商賈鹽船等項不無阻滯雖已由盛商人等集資堵塞而來年漕艘未到以前仍須

設法圖之似非修復三合土壩不能爲功得 旨所有北運河淤淺處所著卽撥款挑挖深通以利漕行其戴村壩工程並著酌度情形妥籌興辦○諭張佩綸奏山西人李鍾銘卽李春山在琉璃廠開設寶名齋書鋪藉勢招搖干預公事煽惑官場敗壞風氣請飭驅逐等語李鍾銘身爲商賈膽敢不安本分至於此極而應嚴行究辦該侍郎所稱該商人捏稱工部尙書賀壽慈親戚招搖撞騙一節李鍾銘與賀壽慈究竟有無戚誼著該尙書明白迴奏其所稱與內外官吏交結往來包攬戶部報銷打點吏部銓補爲京員鑽營差使爲外官謀幹私書帶用五品冠服每有職官引見驗放混入當差官員出入景運門各節著都察院堂官將該商人傳案逐款訊明據實具奏至身膺仕宦宜如何敦品勵行謹守防閑若如所奏近來士夫不分流品風尙日靡至顯秩崇階有與吏胥市儈飲博觀劇酬贈餽遺實屬不知自愛嗣後如有此等情事或一經奏參或別經發覺定當照例嚴懲決不寬貸○撥江蘇浙江漕米四萬石賞直隸文安等被災州縣○以興廉爲內閣學士○辛丑飭豁免金州戰船木料○派董恂寬岡徐桐啟秀爲歲修東西陵工程大臣○駐藏幫辦大臣錫鎮因病乞休允之以色楞額爲駐藏幫辦大臣○壬寅諭賀壽慈奏遵旨明白回奏一摺據稱該尙書與商人李鍾銘並無真正戚誼素日亦無往來其有無在外招搖撞騙之處請飭都察院查究等語著都察院堂官懷遵前旨將李鍾銘傳案確切查訊據實具奏○諭軍機

大臣等恩承等奏川省官運局經隨民呈控多欸請飭妥爲區畫或仍由官運或官督商銷總期無虧成
本實惠及民等語該省鹽務究應如何辦理方於國計民生兩有裨益著丁寶楨按照該隨民等所控各
節確切查明嚴剔弊端體察商情或應仍由官運或應改官督商銷據實具奏不准稍涉迴護該隨民等
原呈著該督向恩承等咨取閱看○癸卯諭李藩奏商人李鍾銘卽李春山又名李炳勳舊舖住宅佔佔
官地並將棲止貧民義院漸佔造房請飭嚴訊等語著都察院堂官歸入前案確切查明據實具奏○諭
前據給事中吳鉅奏參四川總督丁寶楨不諳機器私磨庫欸縱容私人徇庇劣員等情當派恩承童華
前往查辦茲據查明覆奏原參各欸或查無實據或事出有因惟所設機器局費用較鉅製造未能精良
著該督撫卽將此局停止以節糜費道員勞文翹管理籌餉局務所稱並無提銀送歸督署之事有無掩
飾著將該員先行撤去差使資成藩臬兩司將歷年收發欸目逐一清查核算如有不實不盡再行揭參
委員李忠清雖無藉事漁利情事惟與開設餘慶隨之鄧中衡等認識致遺物議著卽撤去差使以息浮
習至原參道員丁士彬勞文翹前署華陽縣知縣田秀果與門丁黃瑞廷交結等情雖無實據然人言藉
藉豈盡無因除丁士彬業經革職外著該督卽將田秀果撤任督同藩臬兩司隨時密查該員及勞文翹
聲名如果平常卽行據實參奏不得稍涉迴護並著將家丁黃瑞廷驅逐出境毋任逗留○諭李藩奏前

員等道及直隸道府與各省駐防旗員有距該旗籍五百里以內者請飭明定迴避章程等語著吏部議奏○甲辰諭宗人府代奏貝勒奕劻之本生父病故懇請成服百日請旨辦理一摺貝勒奕劻之本生父綿性現在病故奕劻暫准其成服百日奕劻在御前大臣行走有年尙屬勤慎著將綿性已革副都統銜加恩賞還○以拿獲匪首功予總兵潘鼎立知縣黃士沅優敘○以師曾爲內閣學士○諭軍機大臣等前有旨將色楞額解放駐藏幫辦大臣現在藏中事務甚關緊要丁寶楨於藏中近日情形尙能講求該處應辦事件如何相機整頓方能操縱合宜著色楞額就近晤商該督先事籌畫務臻妥協